





徐騎省文集卷第二十四

序  
詞  
贊  
銘  
論

送潘湖州序

送刁桐廬序

送高紳之官序

送汪遜序

送葉元輔秀才序

連珠詞五首

安金藏畫象贊

參政李公真贊

玉芝贊

方竹杖贊

筠州三清觀逍遙亭銘

虎谿銘

龍山泉銘

晁錯論

伊尹論



出處論

送潘湖州序

士君子所以貴于衆庶者以其能理民也理民者莫若二千石其地廣以其勢重仁以字之義以斷之文以行之信以成之于是乎優游暇豫以平其心薰其和數者闕一則不足以為良二千石矣吳興名郡新被大化延頸企聳以佇德音以成德之才之道將明主憂勤之旨而頒詔條當下車政成待箴諷况蘋洲雪谿天下勝絕緩轡縱擢嬉游其間發之以詩詠參之以奕思名教之樂何以過斯豈唯吳士

陸香圃三間草堂藏書

民歡康固亦我曹企慕閣長隴西公躬義聳善賦詩寵行懷文之士靡不間作視衆君子之詞知成德之為人矣某辱事舊之尤者是用冠于篇首

送刁桐廬序

陶彭澤古之逸民也猶曰聊欲弦歌以為三徑之資是知清真之才高尚其事唯安民利物可以易其志仁之業也元賓長官生鐘鼎之族處綺紈之間懿文敏行角立傑出雲心鶴態蕭然物外而世祿所及初筮實從策名蘭臺寓直宮省掛冠解紱至於再三終以地連肺腑時屬憂患龜俛從事出



入十年及時移世改自以為獲平昔之志矣而物  
有萬殊命不我與昔之朱紫盈門今則羣從無所庇  
矣昔之金玉滿堂今則簞瓢不常給矣乃慨然曰  
潔其身而忘其宗得為孝乎于是濯纓清流投迹  
名路紆此菑綬泣於桐廬暮春三月飲餞都邑傳曰  
人之所欲天必從之嘗聞桐廬江浙之勝景也朱張  
顧陸遺墟邇焉王謝任沈舊迹存焉山水林壑應  
接不暇夫以天下之廣而首獲此邑非天從子之  
欲乎將維新之化撫思入之俗道在於已事至乃應誠  
接於物令行莫違彈琴詠詩角巾蠟屐推是而往

陸香圃三間草堂藏書

所至必安朝市丘壑復何有異佗日豈失為東方  
曼倩哉離羣之思亦宜裁抑慎夏自愛無假多談

送高紳之官序

高生以俊造之科中聖明之選清秋解褐尹縣南  
荆少<sup>年</sup>得途其道光矣復能追步前哲求以言贈愚  
也不佞試為子妄言之觀夫閭里之民皆能用天  
之道分地之利仰以事父母俯以蓄妻子重生畏  
法蓋真性也其所冒沒詐偽由吏擾之也吏所以  
能擾之由賦役之煩也賦役之煩由為政者從諛  
也大君之與下民其勢曠而不接故設守宰以代



一人之耳目焉受百里之寄當以百里為已任民之舒慘由乎已已之窮達存乎天率是道也其何往而不可此老夫平生之所吾守子以為如何哉

送汪遜序

士君子懷道于己有志於時講學以聚之脩詞以發之不苟且於名譽不隕獲于貧賤見之於汪生矣生家世從宦幼而孤子託迹于諸侯之門主人武夫不知其善輕田文之下客棄衛青之舍人迨余季氏司貢籍克日將涖職恚出羣士所贊文共詳之首舉一通乃生之文也相與驚歎曰此子文

陸香圃三間草堂藏書

甚高而名甚晦是必守道寡合者也即與之上第既而主人大慙乃全上御名造誣謗布於用事者由是以

不得調余時參典選事抗疏論事始得為嶺隅一尉生亦怡然不以屑意歷佐二邑皆有善聲及至天朝復幹郡掾考績稱最遷秩新都白髮青袍惠然訪別君子曰士之處世不欺闇室不羞小官游心于自得之場措身於無過之地以此行天下雖蠻貊可也况右蜀之域列仙之都風景融和山水奇秀一時之遇誰克知之行矣自愛無假詞費仲冬十一月序



送葉元輔秀才序

君子依仁據德讀書為文孜孜于求已汲汲於待問蓋將以行道濟物勤身存教然而有不偶者焉人君側席求賢懸科取士昧旦丕顯日旰忘食蓋將以盡一國之才成天下之務然而有所遺者焉此古人所謂離合之由運命之謂也君子審其若此故退而無悶進而無矜豈以無可奈之命而撓不可奪之志間者愚及諸賢品第貢士于南宮其間高等者數年之中登第略盡今所遺者唯葉生而已苟有良田何憂晚歲先後之間其與幾何哉

陸香圃三間草堂藏書

行矣葉君蘋洲若下清風朗月一時勝賞矧復故鄉唯恐子青雲之志不得嘯傲于其間爾慎夏自愛無假多談已丑歲孟夏序

連珠詞五首

背時則棄不必論貴賤之殊適用則珍不必論精麤之異是以淳風既反抵金壁于山林考室已成間泥塗于采萃  
運不常偶體道者無憂時不常來抱器者無滯是以霜露既降徂來不易其貞弓矢載橐薰澤不踰其利



道不可以權行終則道喪情不可以苟合久則情  
疎是以兵諫愛君君安而忠節已失同舟濟險險  
夷而取捨自殊

先王之道或拙于合變之謀萬乘之權或輕於衆  
人之力是以時逢革命夷齊餓而呂望封運偶愛  
才絳灌強而賈生絀  
有用于物雖遠弗遺無功于時雖近猶棄是以梗  
柁在野見采于良工蒿艾在庭不容於薙氏

安金藏畫象贊

心腹腎腸所以為人安公感激捨此求仁既已其

陸香圃三間草堂藏書

亂不愆厥身眉壽高位惟天所親咨爾百世仰之  
愈新

參政李公至字言幾年三十八真贊

金玉其相君子之容廟堂之器多士攸宗謀先帷  
幄道合雲龍絕景橫鶩干霄直上黑頭三公風流  
宰相人具爾瞻惟肖之像

玉芝贊

天地粹和之氣交感化成鍾于人事為仁孝鍾于  
植物為芝英故以孝行感必芝草生以類至也宜  
春易君延慶先君從籍來占臨淮清節考終因葬



其郡君茹荼泣血廬墓終喪申罔極之哀盡善居  
之禮里閭率化生植效祥乃有玉芝產于瑩域擢  
本數十爛然叢綺柯條交御名玲瓏朗瑩膠枝俯映  
間以葩華雪英碧蘂紛敷的皦客有好事者圖之  
而來蓋耳目所及圖象所紀未始有也余與君遇  
甚邇而駿君伯氏聞君世家積善餘慶果生孝子  
且有奇應以振淳風昔天台之琪樹唐昌之玉蘂  
皆以珍麗見頌詩人比之于此曾何足貴乃為替  
曰英英玉芝生彼丘墳交柯離翼揚葩敷紛神之  
應斯其意詭詭愷悌君子莞然泗濱孝心潔白孝德

陸香圃三間草堂藏書

升聞撫翼亨衢振衣衡門最增爾虔以永後昆

方竹杖贊

彼美者竹確乎貞堅峻節無撓虚心體玄用之扶  
老可以窮年所不足者其形乃圓誰謂奇標產于  
巴夔削成廉稜挺然端直既方既勁斯為全德會  
吾素心寶爾無極

筠州三清觀逍遙亭銘

羽客吳君心馳窈冥興隆道館陟降真靈綽有餘  
裕建茲幽亭下臨曲池甘泉清泠環植嘉樹羣芳  
苾馨俯矚長川滄波帶縈前睇仙山奇峯翠橫



游者忘歸居之體寧君子脩道物境與并必有福地居為殊庭勤行不已可臻層城我聞其風用利斯銘

虎谿銘

遠公宴居虎谿之陽將迎順禮步武有常斯須或違猛摯為防其閑不逾其道弥光湯湯碧流與名俱長咨尔后學鑑之勿忘

龍山泉銘

建康城北有雞籠山焉旁帶潮溝却臨後湖宋元嘉中改為龍山湖曰玄武紀瑞也雷次宗之儒學

陸香圃三間草堂藏書

蕭子良之西邸遺蹤可識爽氣長留東麓有泉至清而甘水旱不增減道人令隱今上御名精廬于其陽酷愛此泉以為靈液因思前作皆有銘贊而此獨闕常欲補之無何夕次松下恍惚若夢見一人玄巾素衣謂隱曰此泉已有銘矣因徵其文即高吟四句吟罷不復見觀其詞意無以加也余聞而異之因篆於石其詞曰  
源發石中派分塵外如醴之味與時而在

晁錯論

愚因讀李觀所為文見其論晁錯盡忠于漢而袁



盜以私讎陷之景帝過聽可為王者之羞誠皆然也  
也以愚觀之則盜錯之罪一也夫二子者才識度量不  
相上下遭天下初定文帝勵精求理能用善言故  
盡忠論事並獲聽用而皆欲功名在我莫肯急病  
讓夷故相與為敵非素有父兄之讎也及七國兵  
起而錯遽欲按治袁盜宜知吳之計謀其吏不聽  
而止盜聞之懼遂反譖錯焉然則忘公家而務私  
怨其罪先在錯也夫古之君子為而不有功成不  
居付物以能任之則逸故能成可久可大之業今  
二子者冒道家之所忌以智能為身榮故終于惡

陸香圃三間草堂藏書

是知道不可離也如此

伊尹論

伊尹放太甲論者多惑其臣節請試論之太甲在  
諒陰百官聽于伊尹太甲不明者蓋居喪之禮有  
闕修身之行不周伊尹訓而罔念慮不堪繼統故  
徙于成湯之墓使其親見松柏切感慕之心追思  
王業知艱難之迹三年之制纔終伊尹乃迎歸于  
亳非謂絕其大位幽于別宮也古之言質故與放  
逐同文亦猶君臣交相稱朕下告上亦為詔也霍  
光憂昌邑王淫亂而不敢有異謀田延年盛稱伊



尹廢太甲以決大事宗社之故不得已也本非如  
霍光之廢昌邑也聖人舉至公于前姦雄躡陳迹  
於後自古而然非聖過也魏晉之後更相傾奪皆  
引堯舜揖讓為詞亦當不可罪克舜矣禹讓天下  
于益益知天下歸啟故不敢當苟天下歸益益則  
為王亦無愧也如今太甲遂失德天下歸伊尹伊  
尹復何辭哉今天下未忘成湯故尹復奉太甲無  
傷于至公也夫古之有天下者一身處其憂責億  
兆蒙其富壽天下既理則辭之巢由是也天下不  
理則受之湯武是也後之人役天下以奉其私故

陸香圃三間草堂藏書

比于騎獸不可下步驟之相遠如此豈可一槩而論哉

出處論

人之為貴與天地參者也是則有四人焉食為民  
天故農為政本工致天下之器用商通天下之有  
無此三人者交相養者也而士人者無所資于三  
人而坐受其養何也蓋為之君師而司牧之教其  
不知卹其不足安其情性遂其生成為之立上下  
之節正長幼之序闕一則亂故魯哀公曰信如君不  
君臣不臣父不父子不子雖有粟吾豈得而食諸是  
則資三人之最切者也故享天下之祿而無愧及世



之衰也上之道不被于下下之情不達于上億兆困窮無所告訴在位者惠不及物徒以富貴為身資君子恥之故逃之而隱於陵為農輪扁為工弦高為商如此者不可勝數是皆失路之人也不宜無功而徼利故任力而自食以免貪冒之罪非其所欲也不得已也而後之人不本其意以為高尚之士桎梏軒冕糝糠祿若爾則伊臯稷契曷足貴哉或曰伯夷叔齊當文武之世曷為棄之而窮處也答曰聖人一致而百慮殊塗而同歸天下至大非一人所能兼也力之所及擇處一焉當是時十亂

陸香圃三間草堂藏書

協心以著剪商之業沛有餘力矣故夷齊不復措意于其間至于正君臣之大節垂百世之大統則十亂不能兼也故夷齊以是為己任焉方知扣馬而諫右左欲兵之太公曰此義士也扶而去之夫以夷齊為義則明己之不義矣故歸惡於己以成立義之志是太公知夷齊之心也夫積德累仁之聖因八百諸侯之心以滅獨夫之紂盛業如此而義士恥之不食其粟乃知以臣伐君之惡也大矣則後之帝王罪未及桀紂諸侯之德未及文武敢有闕竊者乎故春秋之時周室微弱不絕如線以桓文之強大不敢自用乃糾



合諸侯以尊王室則夷齊之功所及也迨至秦漢興替之際士君子濡足授手之時而商山四皓隱居自若夫四皓者知漢高之寬仁神武有三傑之輔足以安天下無待于已故也及太子之危留侯不能正于是褒然而起以救其失若夫出處之分高尚之名皆不以屑意功成不有超然而去于是有應耀者與四皓俱徵應獨不至時人為之語曰商山四皓不如淮揚一老彼應生者蓋知四皓足以安太子無待于已故不出也不然豈獨潔其身乎斯皆大人君子至公之舉而淺局者輕為褒貶不亦傷乎

徐騎省文集卷第二十四

陸香圃三間草堂藏書

徐騎省文集卷第二十五

碑銘

大宋李公德政碑文

大宋新建上清太平宮碑銘

大宋重修蛾眉山普賢寺碑銘

巫馬大夫碑銘

江州彭澤縣脩山觀碑

大宋推誠宣力翊戴功臣金紫光祿大

夫檢校司徒使持節齊州諸軍事齊州

刺史充本州防禦使河隄等使關南兵

馬都監前御史大夫上柱國隴西郡開

國侯食邑一千九百戶李公德政碑文



臣聞四岳疇咨帝堯所以光宅惟良共理漢室于  
是隆興然則運歷冥符風雲交感必有則哲之后  
乃有稱職之臣用能遠肅邇安刑清俗富其或久  
于其道課最于時行邊按部藉其能羣吏萬民浸  
其澤流芳金石舊典存焉公名漢超其先隴西人  
因官移籍今為雲中人也柱下史之真源克昌厥  
後前將軍之壯氣不墮其聲世有哲人多為名將  
脩諸前載可以不書昔者同光之季莊宗失馭公  
烈考諱霸德實典親衛力扈乘輿奮不顧身有死  
無二忠顯于國慶鍾于家及公之貴詔贈左監門衛

陸香圃三間草堂藏書

將軍夫人石氏追封本縣太君道不虛行沒而可  
作有後之報斯焉豈誣公方幼而孤嶷然特立英  
果之氣出於天資遠大之期志為時用年未弱冠  
自奮從容軍始負羽于魏侯復策名于鄆帥有周受  
命選入禁軍夫忘歸之鏃非逢蒙無以宣其利絕  
影之駿非造父無以騁其能

今上當歷試之辰受有征之任妙選比栒公首預  
焉上黨之役名書勲籍奏發劄之及超漸陸之程  
及眷命有歸飛天在運攀鱗之効捨爵攸先乃掌  
句陳式嚴徽道恩威洽著而七萃知方夙夜惟寅



而九重甘寢暮歲考績較然可稱  
皇上以文武之任中外惟一有和衆之略必著撫俗之  
能有衛社之勤必堪守土之寄越建隆二年拜齊州  
刺史本州防禦使爾乃海岱封圻虛危躔次歷下屯  
兵之地夙表要衝東陵聚衆之鄉素稱暴桀公本  
以簡易濟之強明恕己以兼容正身而可象先之  
以孝悌故其民和則爭訟息而囹圄虛矣示之以誠明  
故其民信則賦役克而儲廩實矣農時不奪故曠  
土闢而生殖滋關市無征無征故百貨通而財用  
足于是舉廢典正國容樹門反坫以備制度高閎

陸香圃三間草堂藏書

厚垣以待客使蒸肴折俎以宴嘉賓椎牛醜酒以  
享軍旅出於私積無以家為近悅而遠懷家至而  
戶到一年而宿弊革載稔而新政行郡齋肅然清  
嘯而已由是知董戎之用可移之于頒條露冕之  
風可推之于護塞乾德二年詔公以本官充關南  
兵馬都監幽都南際河間北壤守方之要慎東為  
難至則遠斥堠審號令養士如子戢軍無私威聲  
颺馳亭障山立絕關邊之虜有狎野之農而郡之  
大事亦昏聽命千里之內若指掌焉二職交脩七載  
如一開寶二年召赴京師天言褒慰復遣還郡而戍



士思慕毗俗繫憑故其年冬再為闕南監護公負  
侷儻之氣蘊沈厚之謀民已安而政益脩邊旣寧  
而備愈謹績茂而不伐寵至而若驚君子知福祿  
之攸歸郡人感惠澤而思報于是僚吏之屬耆艾  
之徒相與上言願旌不朽且曰任賢使能天子之  
明也計功稱伐先王之典也非有理世孰揚頌聲優詔  
嘉之克遂其請昔者考父循墻之頌非曰君恩當  
陽沈水之文真成自伐豈輿情欣洽令譽升聞播  
樂石于無窮等高山而可仰永惟懿美足煥文明  
爰命下臣勒銘紀實其辭曰

陸香圃三間草堂藏書

茫茫禹迹畫為萬國建侯定守立民之極提封且  
千屬城以百懷惟威惟懷有典有則威懷伊何君子  
時中典則伊何三代同風以使則悅以令則從率  
是古道茲惟李公濟水之南東陵之下伏生荒耄  
盜跖狙詐嗟我蒸黎孰聞道化至魯猶遠尊周靡  
暇李公來思富之教之政先體要物必由儀夜犬無  
撓晨羊不欺歸民影附末俗風移天下雖平四方  
是守栢栢虎旅懾爾戎醜藉我兼資是率是糾道  
合舞干威行戴斗郡政旣成邊塵旣清僦僦比屋  
肅肅連營夫懷其惠人竭其誠欲報之恩思思垂頌



聲明明大君知臣善使舉必至公美與虛美用建  
隆碣永昭信史錫爾介福施于子孫晉稱峴首漢  
紀燕然風流不續寥落千年猗歎良牧無愧前賢  
高深自改蘭菊常傳

大宋鳳翔府新建上清太平宮碑銘 并序

臣聞鴻荒代序太極流形二儀肇判而猶通萬類  
交馳而未別巢居飲血孰知王者之尊物魅神姦  
尚作生民之患于是聖人繼統大化宏開畫八卦  
而序四時奠五山而分九服衣裳軒冕采章之制以庸  
動植飛沈性命之宜畢遂高卑既位幽顯既分蒸

陸香圃三間草堂藏書

嘗雩禱致其恭宗祝史巫紀其秩猶或觀其道而  
設教依于人而後行通其變而不窮感于物而遂  
動未始有極無得而名其或數偶三災德如二季民  
懷慈衛帝念疇咨必有靈符允歸興運易著與能  
之旨傳稱觀政之徵史過之論至哉左氏之書詳矣  
我國家受天之命如日之升御六氣而平泰階麗  
大明而照萬國清亂略於百王之季反淳風于遂  
古之初天瑞呈祥羣靈受職粵 御曆之元祀有  
神降于鳳翔府墊屋縣之望仙鄉其象不形其言可  
紀蓋立帝之佐命禹強之官聯真位參于紫微



靈職分于井鉞其稱述則儒玄之奧旨其敷演則  
禳禱之嚴科教義之深也則孝友姻睦之行興焉  
威力之大也則魍魎魑魅之害除矣由是秦雍之  
地尸而祝之  
太祖神德皇帝聖智淵深睿謨默識饗之明德待以  
不祈方且奉天時而答靈心握玄符而齊七政故  
得皇猷允塞庶績其凝舞兩階而四隩來同正九伐  
而庶邦承式得遺珠于罔象協吉夢于華胥乃知  
玄告之不誣駿命之如響豈止五車兩騎來為牧  
野之祥亦帝素靈出表芒碭之應而已哉

陸香圃三間草堂藏書

今皇帝千年應運二聖繼明恢大業而維新浸深  
仁而累洽如周王之翼翼若夏氏<sub>后</sub>之孜孜聖作無  
方先幾靡測雲門大濩綜六代之昭聲稷下淹中  
采百家之精義酌而不竭者衢樽之味仰之彌高  
者垂象之文王澤既流頌聲無數而復念深後后  
義切勤民睿眷春臨皇威雷擊大禹會諸侯之  
地盡入隄封宣王逐獫狁之鄉率從稽服舉無遺  
策役不逾時聊存尉候之官已戢橐鞬之器瑤圖  
之盛也如此珍符之至也如彼深惟彤璽益驗昭明  
而豐報未嚴壽宮不度非所以光敷景貺垂示方



來者也夫庸庸祇祇為政之要元元本本致理之  
端蓋神之命受于天天之造始于道是用歸誠衆  
妙訪制昭臺申畫福鄉聿崇仙館緬惟虛皇之真  
境參以聖曆之嘉名詔立上清太平宮於所降之  
地尔其星分玉井邑峙金城終南峻極鎮其前渭  
水清深紀其後鮮原靡迤接漢皇訪道之臺佳氣鬱  
葱對關令栖真之宅物皆茂遂風雨因愆人盡淳  
和舟輿不用瞻新宮之為狀也崇墉繚野絳闕凌  
空秘殿雲高俯軒櫺而轉眩脩廊繩直步欄宇而  
中疲極丹青黼藻之工窮銑鑿璧璫之飾玉几正

陸香圃三間草堂藏書

御瑤壇在庭 帝座既嚴衆真畢饗鹿巾霞帔之  
士霓旌絳節之儀空歌洞章揚其旨紫煙素雲散  
其采颺歛之馭縹眇于太虛氤氳之氣充被于羣  
有至矣哉元后之德與天地合真人之應將富壽并亦  
何必定郊鄩以卜年禪岱宗而探策者也夫金石  
之刻雅頌之興所以示民不佻永啓厥後况乎尊  
道貴德廣清淨之風窮神知化超言象之表是宜  
告於太史副在名山爰命下臣式揚丕烈其銘曰  
上天之載無臭無聲恍惚有象氤氳化成寄以神  
理發為昭明惟德是輔惟皇作程赫矣元后悠哉



遂古成有靈貺式昭天祚龜出清洛鳳臨玄扈赤  
字興堯玉書授禹降及商亳建于邠岐天子所啓  
神亦格思性玉有秩馨香孔儀奕奕宗祝子孫保  
之道德下衰質文不復俗限楚夏運遷水木時歎  
陵夷民嗟慘黷必有真人應圖受錄

皇哉帝宋大極橫流出自蒼震類兹九疇垂衣卷  
領端拱凝旒永言建福式協人謀有煒明靈降從  
玄極致帝之命觀政之德用薦忠信寧惟黍稷藉  
陋蕙蘭帳非甲乙運鍾二聖慶洽重光誕敷一德  
奄有八方時文載郁我武惟揚通幽受職罄宇儲

陸香圃三間草堂藏書

祥乃眷珍符本乎至道肇建仙館是彰玄造前望  
終南旁瞻豐鎬泱泱平原崇崇新廟端闡特立秘  
殿宏開九華之室方丈之臺平闕列闕直寫昭回  
崆峒邈爾姑射遼哉聖靡不通道無不在靈揚旣  
穆祀典無改福尔蒸黎格于四海用刻貞珉永垂  
千載

大宋重脩峨眉山普賢寺碑銘

并序

臣聞聖人闡化必有胥附之資賢士膺期必垂不  
朽之迹是以顏回默識冠師門于洙泗之濱尹喜  
受經應真氣于崑函之右故得千載之下好學之



徒入其國而知其教思其人而愛其樹聖賢相遇  
有如此焉在昔像教權輿能仁命世綜百靈而貫  
羣動歸向如流窮絕國而亘諸天感通若響爰有  
法王之子來從普勝之方憑翼真乘道揚宗極具  
大悲之願行綜小智之因緣從我立名斯為上首  
及乎慈航既濟慧炬分華乃暨衆真俱承佛敕乘  
六牙之瑞獸降右蜀之靈峯將以協井絡之會昌  
鎮金方之勁氣猶且潛而勿用明而未融闔持摩  
頂之仁陰隲含生之命故使神嬰青縷肇建國都  
路闢金牛始通華夏沈犀息沴李太守之玄功喫

陸香圃三間草堂藏書

酒救災藥尚書之妙用郡開學校文翁廣洽于儒風  
樂播中和四子誕揚于帝德萬爾褒斜之域穆  
然周漢之民非法力之攸憑豈人謀之獨得其後  
金人既應白馬斯來神開顯俗之嚮家識致誠之  
所于是祥符煥爛靈變紛綸或則銀色浮空與朝  
陽而共麗或則燈光並列將夜魄以俱明聖衆盪旋  
真容隱見竒蹤萬狀不可勝圖瞻之者耳目咸新  
聞之者身心共肅一方欣賴歷代脩崇遂于白水  
之源特建普賢之寺金玉交運開闔不常白毫之  
相常存法鼓之音靡絕夫以滇江遺迹天漢名區



必有道之見歸豈三分之能久  
太祖神德皇帝文脩內禪武定中區正卿揚九伐  
之威遠俗致七旬之格納蜀王之土貢受劉禪之  
騾車重鈕坤維還銘劔閣于時王風初被汙浴尚  
繁游魂篁竹之間假息荏蒲之際匪輕刑之可禁  
頽先甲以徒勤金地寶坊浸成藪澤田衣毳褐漸  
致流離妖禽既就于焚巢紺宇終悲于閭戶雖復  
葺其橈棟繕彼堦垣而陞序猶卑基局未  
尊號皇帝長君嗣統二聖重熙覆萬物以如天廓  
重昏而比日聿脩成業欽若靈心尺書徵懷德之君

陸香圃三間草堂藏書

折筭定畏威之地盡炎洲而極玄朔尉候徒存亘  
日域而浹流沙車書莫二然后勝殘去殺反朴斲  
雕包干戈以虎皮鑄劔戟為農器定大護雲門之  
樂舉淹中稷下之儀慈衛仁薰時和俗阜天地應  
而慶雲甘醴律呂調而玉燭景風猶復成而不居  
勤則有繼一游一豫表王度之惟常必躬必親示  
庶民之光聖慮極冰霜之誠皇綱畢舉睿思彌精  
以為象外微言無生妙理脩于心則圓通無滯被  
于物則福應來臻足以助王道之和平致蒼生于  
仁壽乃申明詔歷選精廬唯此峨眉福標殊勝天



真人皇論道之地楚狂接輿隱景之鄉封域之間  
氣象盤薄洪源奔注二江雙流沱潛之川浚岷迴  
環玉壘銅梁岷嶓之阻况禪枝擢秀來自祇園法海  
餘波別疏定水慈氏所相疇能廢之烝哉聖謨符  
此玄貺五年春申命中使率將材人代貞石于它山  
下瓌材于邃谷或子來而肆力或神運以標奇模  
制度于鷲峯極莊嚴於花界耽耽正殿轍轍飛甍  
玉甃丹楹金鋪璫闥洞戶順陰陽之候中宸變寒  
暑之威揭以端闡統之周廡鑄鴻鐘之萬石貫猛  
簾之千鈞桀孽凌空鏗旬震野其後則層樓入漢

陸香圃三間草堂藏書

飛陛連雲采檻離婁冠餘霞而上出璇題的礫綴  
列宿以旁迴神明之臺不足以語其高天梁之宮不  
足以矜其麗鑠金為字寫大藏之經祕于上逾五  
百函範銅為像擬普賢之容設于下高二十尺味其  
文則如來之宗旨可得而觀禮其相則菩薩之威  
神于是乎在將使三蜀之地一切有情皆冲氣以含  
和盡革凡而成聖則知大雄之教漸于世也深焉  
元后之仁利于民也至矣昔者軒皇訪道歷襄野  
以猶迷漢帝祈年拜竹宮而無得恭惟盛美允屬  
皇猷若夫事以頌宣言以文遠作而不記後嗣何



觀爰命下臣式旌不朽其銘曰  
允矣象教洪惟法王如河不竭比日同光有情斯  
應無遠弗彰化自八國聲馳萬方爰有大賢是稱  
達者異境齊致同聲協雅聞道莫逆瞻顧不捨乃  
演真乘來儀東夏峨眉之阻羣帝之庭作固作鎮  
棲真宅靈普賢至止潛耀千齡爾未我覩我疇尔  
形經教旣孚神明乃作瑞相顯晦圓光歛霍萬變  
凌峯百靈溢壑信士歸依輿人駭愕崇崇梵宇于  
此宏開時遷末運數偶三灾焚如魯廟傾若齊臺  
淳風必復聖日新迴赫矣皇圖烝哉二聖混一區宇

陸香圃三間草堂藏書

受天明命與物皆春得人為盛式叙九疇迭修三正  
皇帝曰咨咨爾西人助我神化其惟正真為爾祈福  
轉茲法輪禪林則舊寶刹惟新秘殿忱忱高門奕  
奕脩廊四注層樓百尺尊經聖像金文寶質妙善  
周圍福釐繁錫乾光俯燭慧炬朝燁同開壽域共  
闡重昏驅氓之伍杜宇之魂乘是妙果俱登法門  
明明大君照臨下土墜典咸脩靡神不舉彼都人士  
式歌且舞揭此豐碑永傳終古

巫馬大夫碑銘

大夫與宓子賤俱事仲尼迭宰單父宓子恢上聖



之道舉任賢之明故有鳴琴之化大夫勤以繼德  
身親其勞故有戴星之迹從師則同行道則背其  
何故哉夫天下至大也萬物至衆也至大者不可  
以一槩量至衆者不可以一術治故君子出處語默  
屈伸變化一致而百慮同歸而殊塗其要存在至  
公于百代不私榮名于其身而已若夫上德無為  
玄功不宰知人則哲付物以能功成身泰神全理  
勝與夫勞心焦思矐瘠胼胝勝負之間較然可見  
狗名之士皆奔走之則將有志小而謀大行迹而  
志遠推是以往天下必有受其弊者子期知之故

陸香圃三間草堂藏書

就而為其節制並分聖人之體以極萬物之變效  
伯禹之力師文王之勤夙興夜寐不遑啟處仲尼  
識其志故譽子賤而不譏子期以此防民而西晉  
王夷甫之徒猶祖尚浮虛望空署白以亂天下則  
子期之慮不亦遠哉夫君子道積于躬惠加于物  
事至而應時動則隨功之豐約視事之細大力之  
勞逸繫時之險易致理而已何常之有焉舉成績  
而較優劣難與言智矣泱泱舊國藉藉遺芳舊俗  
不偷頌聲未泯行太守事彭城劉君名察望高持  
憲寄重頌條以師古之學舉時中之政訟庭益簡



祀典咸脩永懷前賢願紀貞石鉉也不佞承命為  
文其銘曰

烈烈先聖侑侑衆賢升堂入室體道同玄其用無  
方萬化齊焉其教無窮百世賴焉文王既勤大禹  
盡力英英子期服勞繼德夙興夜寐自強不息苟  
利于後唯變所適季世道薄務華喪真居簡行簡  
不躬不親亂由是生俗以之淪思我子期亡已為  
人瞻言舊鄉魯道之首邈哉二賢佐佑先後同焉  
皆得通則能久千齡旦暮敢告邦守

江州彭澤縣脩山觀碑

陸香圃三間草堂藏書

混元資始玄造權輿道以久而化成樸既散而為  
器聖人在位脩之於天下則有明堂清廟表訓民  
事神之方賢者貞遯修之於身則有名山福地為  
朝真降靈之所小大則異宗致惟均江州彭澤縣  
有脩山焉瞰天險而高標抗廬峯而特立氣雄而  
勢聳翠積而光寒峻岷深岩風雲蓄泄茂林穹谷  
材用蕃滋游居之所走望真隱之所棲息考諸圖  
牒昔靜節先生游憩之地也杉松交影猶懷種柳  
之風山水清音尚想素琴之意遺德所及仙祠以  
興梁大同元年有句曲道士尉文光靈氣夙成陰



功將滿遐擇勝地以恢妙門聿來此山益廣基今上御名  
制度無闕標題載光越二年尉君白日登晨舉邑  
咸覲人民未改甍歛載還霓衣則殊鶴貌如故稅  
駕之地甘棠永存故今有尉駕池焉而中山丹灶香  
爐松壇石室儼然竒迹若奉宴居歷代嚴恭有如  
旦暮唐狄梁公履虎不啞弦歌此邦企仰仙游重  
加崇飾又塑高宗大帝聖像以伸送往之誠朔望  
朝拜不失常禮復以錢五十萬為致田園厨廩所  
資至今猶賴季唐之世臨川宋震來為宰邑掘地  
得藥鼎藥合因建尉真人之室于東序設象以奉之

陸香圃三間草堂藏書

秩滿還鄉遂入麻姑山為道士是知清心冥契玄  
鑑孔昭青天白日孰云其遠道士謝又能早參真籙  
夙負時名開館靈場脩嘗踐歷空談秘訣悉詣精  
微克享脩齡言歸廬岳郡侯躬請付以脩山闡教  
之心勤行匪懈棟宇之制日以增嚴端闡屹其穹  
隆周廡紛其迴合煥然蒸繪藹爾重深清澄之氣  
攸充汗漫之游斯在戊寅歲謝君解化弟子王省  
昂繼之方行才亦世出金石之刻僉曰其宜鉉也  
欽羨真猷因為之頌其詞曰  
大道混成脩之乃真必有勝境以居異人南楚之



域玄風所臻邈哉脩山栖靈降神陶令高名尉師  
仙卿狄公元臣矯矯三賢千祀齊聲是相是宅載  
經載營疏此翠巘列為殊庭響像圖玄規模赤城  
瞻之者肅處之者寧心之所至道豈虛行判名翠  
琰永告諸生

徐騎省文集卷第二十五

陸香圃三間草堂藏書

徐騎省文集卷第二十六

碑銘

揚府新建崇道宮碑銘

洪州奉新縣重建闡業觀碑銘

洪州西山重建應聖宮碑銘

驪山靈泉觀碑

洪州延慶寺碑銘

揚府新建崇道宮碑銘

并序

有天地然後有萬物有萬物然後有君臣有君臣  
然後有教化教之大者當由其本則大道是已夫



道積乎中動合于真故能舉堯舜周孔之法奮禮樂刑政之用若道不在焉而守其遽廬則莊周于是糠粃仁義輪扁于是糟粕古書矣夫孝本因心而宗廟簠簋所以致孝也道本勤行而宮館壇墀所以尊道也為政者有能原聖人之旨以垂憲崇列真之宇以薦誠其殆庶乎廣陵大藩四海都會制之盛雄視諸侯土德既微三灾斯今上御名井邑屢變城郭僅存

皇宋膺圖更造區夏雖天寶輔德亦世而後仁今上嗣位之六年詔太常博士孫君邁佐理斯邦君復

陸香圃三間草堂藏書

膺古訓得意玄闕以為教之不興民之安仰于是相爽塏之地即清曠之墟創朝脩之宮奉玄元之御當崇墉之左次俯合瀆之東涯出俸錢以易置運心匠以經度班倕方集畚鍤既興未及僦功移典秋浦同聲之應千里非遙太子右贊善大夫潘君若冲負儒雅之才韞恬淡之量允膺朝選代撫斯民庶政交脩能事畢舉惟茲靈宇既有成規于是揆日庀徒克終懿績若乃殿堂陛楯之制閑闕梁棼之列或躊躇以閑宴或竚竚而曼延睟容肅穆仗衛紛繹搖太霄之佩植紫旄之節樹洞陰之磬扣



豐山之鐘歛若經閬風而歷琳房飄如排玄雲而  
揖丹露風亭月觀之地紫氣浮空歌臺舞閣之基  
芝英擢秀學者假筌蹄而有得游者甘樂餌而斯  
留靄然福鄉正變浮俗既畢雲今上御名乃揚王庭有詔  
賜名曰崇道大矣哉聖人在上墜典咸脩自成岷  
岷之區何假峻峒之間是宜刻于樂石紀在方書某  
也素為道民嘗學史氏以文見屬所不獲辭銘曰  
大哉道源湛然嘗在其質無象其功不宰君子得  
之勤行不怠勤行伊何啟煥靈場乃闢隙荒乃築  
宮墻峨峨高門屹屹崇堂祀事孔明玄儀載光淮

陸香圃三間草堂藏書

海惟揚九州之奧厥民伊何富庶而教天仰靈今上御名  
人知至道咨尔三方是則是效崑岡北峙邗水南  
通聖日麗天真氣盤空煒煒煌煌菟兔熊熊道民  
作頌永播皇風

洪州奉新縣重建闔業觀碑銘 并序

道之為體也大大則衆無不容道之為用也柔柔  
則物莫與校南方之強也故冲氣之所萃異人之  
所生壇館之所宅景福之所興相乎域中南楚為  
盛先聖之論豈誣也哉洪州奉新縣闔業觀者崇  
方志西晉邑人劉真君之故居也真君名道誠以



經明行脩仕至刺史郡守金行不竟仁獸非時知  
幾之賢有道之士卷懷而退脩之于鄉玄德陰功  
昭受靈貺故真君辭張邴之祿追茅許之風單車  
還家勤行不息以永嘉二年八月十五日舉族上升  
謁尔福鄉依然舊址錦帷乍降玉舄長留后學瞻  
望若仲尼之闕里遺民思慕如召伯之甘棠梁大  
同元年乃建為觀尔其豫章垂蔭洪井儲靈華林  
蒼翠當其陽馮水清冷環其域煙霞韜映竹樹青  
葱居然人境之間自是仙游之地載祀四百朝市  
三移封域之間英靈不泯鹿巾霞帔之士往往冥

陸香圃三間草堂藏書

升樞紳逢挾之流時時傑出存諸舊史是號名  
區土德既微羣方今上御名難城有復隍之患室多橈棟  
之凶乃眷殊庭俄悲聞戶而瓊蘊之所秘霜鐘之  
所懸屹尔麗譙儼然對峙有道門都監余守徵者  
翦除宿莽草創精廬苦節忘形五十餘載脩心以化  
俗傳法以度人入室弟子龔紹元吳紹甄皆能肅奏  
真科祇稟道訓惟鄉人之善者知歲計之有餘高  
士胡君名仲堯延慶簪纓息機丘壑師黃老之術  
以虛方寸躬曾閔之行以睦閭門博施濟衆斯謂  
智以為集靈之館祈福之場陋而不度民將安仰



于是揆時屬役即舊謀新詢謀僉同脫信咸萃增  
湫下為爽塏易卑室為崇今上御名棟宇之設則因夫故  
基制度之中則考于經法凡殿堂門闕居室厨廩  
延袤周徧殆且百區三尊衆真羽儀侍衛精嚴肅  
穆不可為狀履端闡造廣庭恍然如從汗漫之游  
即瑤階瞻玉座竦然若奉武夷之會既而息徒已  
事日吉辰良明祀以告成功精意以答真佑舉紫  
旄之節搖太霄之佩然九華之燭奉空洞之章星  
斗迴光煙雲改色青天白日夫豈遠哉于時胡君  
以姻睦之行慈惠之澤里閭稱舉郡國拜聞詔書

陸香圃三間草堂藏書

褒美特加旌表揭以雙闕蠲其追胥江楚之間以  
為盛事是知玄風之被俗聖政之化人變魯至道  
見于今矣夫如是則可以傳芳金石垂裕昆雲俾  
乎好道之徒益勵齊賢之志云爾其銘曰  
大道無名得之為真矯矯劉君知幾其神遜尔侯  
社上為帝賓維梓之地甘棠之人峙此仙祠章江  
之濱華表未歸桑田已改舊井誰滌高臺尚在不  
見芝英猶芳蘭蒨佳氣鬱葱如將有待彼美胡君  
州閭之英世味道腴家傳義聲歸誠玉闕奉贄金  
籙易此積今上御名化為殊庭乃眷福鄉寔惟南楚閱館



相望颺輪交午其圖秘錄唯仁是與刻頌貞珉永  
歸終古  
洪州西山重建應聖宮碑銘 并序  
先儒有言曰山者宣也宣氣生萬物者也然則崇  
岳巨鎮蓋氣之雄者也其間靈峯竒岫又氣之粹  
者也是故帝以會昌神以建福感而生聖賢宅而  
為洞天竒怪恍惚非尋常所能測已西山者作鎮  
荆楚雄視衡巫勢靡迤而崇高氣清虛而和暢動  
植滋茂樵隱閑安物軌之洪崖先生所居于此洪  
井之右澗水之濱喬木森羅古壇猶在長阜廻抱

陸香圃三間草堂藏書

是謂鸞岡北隅特高仍有伏龍之號唐乾元初山人  
申太芝上言其地有異氣詔于此立應聖之宮抗  
玄元正殿于其前塑肅宗聖容于其上繚垣觀闕  
仰法于紫宮路門納陛取規於丹禁光靈煥爛薦  
獻精嚴上士勤行守臣泣職秩之盛莫之與京廣  
明已還三灾在運望拜之地闕而莫脩遼東之鶴  
徒還絳縣之人已老甲辰歲有道士王守玄者緱山  
仙裔茅嶺名流受命藩侯來膺道任翦荆棘於高  
闕之址御名全茅茨于隆棟之基不出焦光之廬自化  
庚桑之俗善言彌遠馴致其功二十許年克甄舊制入



室弟子劉德淳氣冲貌肅節苦行高恪恭以居次  
謙和以接物既嗣其業遂成厥終又十餘年締御名  
云畢凡內外殿宇百有餘區材用善良工藝堅密其  
蒸飾也不踰奢儉之節其廣袤也足展朝脩之儀  
秘殿深嚴靈壇博敞眸容穆若列侍參然鐘磬在  
懸苾芳具薦燦旭景于軒檻延夕月于甍題蕭寥  
空洞之音希夷颺歛之御邈哉真境無得而名鉉爰  
在弱齡服膺至道先君頃叅戎乘嘗泣斯邦依然  
棠樹之人自是桐鄉之邑乃以庚申歲遷奉松楸卜  
兆于鸞岡之陽敢言折臂之祥願占維桑之地明

陸香圃三間草堂藏書

年復以王事再至山中祠虛皇于游帷之宮投龍  
簡于天寶之洞所經靈迹實契幽尋又是山有寶  
光初至之夕即見於中峯之上下至山麓倏忽聚  
散狀如野燎而精明眩目不可正視澗中有盤石  
石有三藥曰歲端午日未曙前常有擣藥之迹餘  
滓在焉水流至此甘香如蜜取以灌漱心府瑩然  
斯皆載于舊經親所覆視者也此山登晨之士接  
武而洪崖為之冠列仙之墟連屬而洪井為之宗然  
則閬風玄圃之在人間者也宜其篆刻金石永齊  
穹壤鄙儒不佞敢作銘曰



江之右楚之區峙靈岳為仙都洪井濱鸞岡隅建  
清宮應真符廢而興神之扶宮既成道既行杉三  
宮朝百靈集景福薦皇明復淳化遂嘉生億萬年  
流頌聲

驪山靈泉觀碑

蓋聞遂古洪荒既表大庭之庫皇猷炳煥亦尊軒  
后之臺是知聖哲相因比千年于旦暮質文迭用  
歷三正以循環斯之謂至公斯之謂不朽頌聲所  
作冊府存焉若乃天地烟燭陰陽孕毓神皋天府  
奠為王者之居靈液甘泉出奉聖人之用丹甌不

陸香圃三間草堂藏書

炊而自熟溫谷不爨而自焚神妙無方所以存而勿  
論蕩衰難老所以酌而不竭矧夫西都舊國東井  
垂芒終南太乙寓其精洪河清渭均其潤湛然神  
井冠此崇山據九州之膏腴備萬乘之湯沐固可  
以蹄筌衆壑眈澮百川猗歎無得而稱已昔在唐  
之方有德也稟金壺之道訓受羊角之禎符奄四  
海而為家綿六葉而愈盛教宗玄默心寄窈冥卷  
領結繩幾致華胥之俗鳴鑿珥節常從汗漫之期  
輿馬之音朝行而夕至玉帛之會天動而雲臻孝惟  
奉先仁不忘本乃于山之北趾建華清之宮玄元之



御當陽而玉瑩五聖之象列侍而星環別館離宮  
連薨接棟朝元長生紀其號電裳羽衣播其聲至  
誠所通純嘏來應太平之運五十斯年三代已還未  
始有也及夏庭兆釁戲水挺灾因室之亂雖平厭世  
之游遂往金莖露掌但有餘基樂水雲謠聊無嗣  
響而巋然真宇儼若清都同光中初殄國讎永懷  
舊物載賡成制肅奉玄科因改命曰靈泉之觀芝泥  
龍簡時脩精禱之儀雲錦鳳羅歲度勤行之士  
是知豐功盛業將歷運以有遷道捷玄闕與虛元  
而共久累朝寅奉五紀于茲素雲紫氣以常霏白

陸香圃三間草堂藏書

鶴青牛而狎至國家朱光繼統綠字膺圖受白環  
于龜山得玄珠于赤水雖三秦父老猶牽望幸之心  
而九服蒸黎重覩開元之日信皇天之輔德諒百  
祿之咸宜道士武又玄冲氣內充仙才外挺紀綱  
道任啓煥靈場薦享惟嚴羽儀若舊琳房浴殿如  
清蹕之時巡絳節朱幡想丹輿之下降幢幢御路  
奕奕宮墻或乘輅建節之賓或觀菽探書之客陟  
瑤壇而增肅瞻玉座以長懷蓋仁風之所被者深  
故遺德之所加者遠是宜播為雅頌告于神明敢  
摛紫素之文恭鏤茗華之玉其辭曰



天地之氣宣以名山陰陽之英融為溫泉聖人用  
之益壽延年同出于道同謂之玄逝矣伊唐蒸哉  
六葉河圖帝籙鴻勳大業天秩孔明真符屢接雲  
蓋亭亭芝房熒熒歸功聖祖過享清宮周垣繚野  
反宇凌空孝思不匱道德惟公希夷有象盼嚮宜通  
數有推移世分今昔屹尔雲御名依然聖迹藹藹脩  
林湯湯神液脩物莊嚴百祥繁錫至哉坎德效此  
神珍配靈上藥薦祉真人冥升自遠遺烈長新思  
玄之老頌德之臣冥懷靡所用勒貞珉

洪州延慶寺碑銘

陸香圃三間草堂藏書

若夫名區勝境真靈之所徘徊通都大邑游居之  
所走望故其府朝之制度里閭之延袤宮廟墀壇  
之嚴裡祀薦享之嚴無不及焉必可觀也豫章古  
郡通楚要津萬靈所宗百寶攸集龍劍之氣炳耀於  
列星金冶之精騰光于峻岳飛錦帷于仙館植鐵  
柱於重陰方志所傳竒蹤可見而故老復言晉元  
帝即位之歲郡人有耕于東湖之良隅者獲璃像  
焉其高三尺其狀殊異守臣上啓詔立寺以處之  
歲紀迭更薦奉無絕至唐太和三年文宗皇帝以  
夢寐通感特詔脩崇有僧普願者率勵衆力創造



飛閣極高明之制盡臨觀之室瞻仰之徒勝賞仍  
在會昌沙汰旋更殄夷時有寺主僧神確躬奉瑞  
容瘞于堂下大中改制將復脩宇像遂堙沈求不  
可得而靈迹所在羣心未忘咸通二年連帥嚴謨  
表請重建因紀誕聖之節署為延慶之寺子來之  
力雲今上御名如初廣明中巢寇亂常羣盜蜂起三灾所  
及寺復焚如光啟二年廉使王師甫即其故基又  
加營繕自時厥後百載于茲市朝屢更興廢不及  
名人上士增飾相因國家奄有寰區普恢教法人  
識脩心之旨家懷祈福之誠此邦之人素多尚信

陸香圃三間草堂藏書

千里之地頻致豐穰戶有餘貲居多暇日監寺僧  
智清勤行其道時省其庸推誠以化人節用以成  
務峻其卑庫緝其傾頽改作正殿及廊廡共七間  
疎楹廣廈雕甍藻稅璪牕洞戶珠網金鋪蹇產鴻  
紛深沈煥爛闕政備矣能事畢矣觀其康莊旁達  
閭伍綺分西則崇山隱天煙霞韜映乎其上前則  
平湖彌望魚鳥翔泳乎其中雖復觀雉接連車馬  
迴合蕭然人外自遠世紛信乎棲息之場習靜之  
地也僧契緣攝贊其事不朽是圖伐石為碑以文  
求我銘曰



至哉玄貺邈矣坤珍凝為異像以祐斯民靈心所  
格精舍攸因其神或隱其迹寧淪廢興在運啟煥  
由人有美清師勤行其道彼都人士服義承教率  
是衆力宇斯廟貌秘殿穹隆層軒窈窕勝事精嚴  
再誠至到名山雄雄大江溶溶五侯之國千里之  
封靈場隱軫道氣明翮神明所相有感必通列名  
法宇永播無窮

徐騎省文集卷第二十六

陸香圃三間草堂藏書

徐騎省文集卷第二十七  
碑銘

洪州西山翠岩廣化院故澄源禪師碑銘

大宋舒州龍門山乾明禪院碑銘

大宋故天雄軍節度行軍司馬易府君神道碑

故唐大理司直鄂州漢陽令贈衛尉少卿樊公

神道碑

洪州豐城縣李司空廟碣文

洪州道正倪君碣

洪州西山翠岩廣化院故澄源禪師碑銘



聖人設教賢者學之有能極深研幾剖疑折滯不背本以矯激不汙波而流宕世人宗仰時君褒異斯可以為君子矣禪師名無虧姓吳氏連江人也昔泰伯獲謗肇啓南藩至德所及流光百代子孫蕃衍吳越為多至今為著姓焉累世隱德鄉曲推重道氣鍾粹而生禪師幼異常童不染俗態年七歲從晉安雪峯真覺禪師出家二十詣開元寺受度真覺之道見重于時禪師默識微言盡得要旨而復博考往行幽尋勝迹江浙諸郡靡不經遊先達推稱后生請益結轍連袂虛往實歸禪師以道貴

陸香圃三間草堂藏書

冲用性復虛靜所止之處學徒俯千人輒復捨去晚歲正廬陵之禾山其名益彰李唐先主召見之特加禮遇俾居廣陵之祥光院嗣君踐祚優禮有加賜號澄源禪師命移處豫章之上藍西山之翠岩院是皆都邑之勝槩高人之游集自非密行淳德不能鎮服羣情我迭居之綽有餘裕雖身在岩谷而恩注帷宸存省問遺使者相望享壽七十有七建隆元年春二月五日終于翠岩院甘露被樹數日不晷皓鶴盤空三周而去門弟子用西域之禮葬於院之巽隅封於其上恩旨褒飾名其丘曰大



醫道俗孺慕會其葬者萬數鉉也趨捨異術聲塵  
致睽于時釋氏方盛師門互啓嘗侍嗣君宴語從  
容上言曰古稱千里一賢猶比肩也今號長者十  
數無乃多乎嗣君深以為然因曰惟澄源禪師其殆  
庶矣無幾何以家門情禮請告至山會師已沒瞻  
仰遺像參迹行事乃信名不虛得亦表君之知臣  
今來京都復與師弟子鑒琮相遇琮師志性端慤  
脩習精勤肅奉成規博綜衆藝慈惠救物時人稱  
之明詔賜號慧覺大師錫以紫服朝恩浹于累世  
實教門之榮觀也于時禪師委順三十年矣琮也

陸香圃三間草堂藏書

思廣銘頌庶永遺風以鉉嘗學舊史見求直筆若  
夫褒善稱伐翰墨攸先載瞻西山實寄松檟敢抽  
秘思以告九原銘曰  
芄芄東越武夷之區時生異人與古為徒禪師出  
焉俊邁且都顯顯南楚西山作鎮真靈所宅教法  
斯振禪師居之允矣今問道無不在法非可名理  
超言象俗仰風聲豐碑載勒勝氣長生猗嗟來者  
用此為程

大宋舒州龍門山乾明禪院碑銘 并序

山岳極天莫雄于瀟霍川瀆紀地莫靈于江淮盥



薄縈帶中畫郡國幅員數千里舒皖居其陽真聖之所躔次景福之所興作必有高士來闢妙門以導精粹之氣以恢淳和之俗則龍門山乾明禪院所以建也是山東去郡九十里蓋瀟岳之一峯山有龍井郡人雩禱之所靈應昭哲因以名焉溪岩洞岫風雲之所畜泄湧泉清池璿碧之所隱見涼颼爽氣五月可以披裘脩竹茂林四時未嘗易葉游方之士至輒忘歸有曉遵禪師者家本宜春幼捐俗累從師訪道歷抵湘沅探幽洞微得聖人之宗旨清心練行踵前作之風聲向道之徒靡不宗

陸香圃三間草堂藏書

仰乾德五載始來此山願瞻林泉有懷栖息邑人宋仁瑗輟其隴畝以奉宴居面壑臨流誅茅穿徑遠擬關令草栖之觀近同焦光蝸牛之廬歲計有餘善言來應廬江人侯霸大施資賄以奉經營數年之間蔚然崇今上御名複廟重屋璪牕洞戶藻以丹雘駢以璧璫所以重威神也黌堂講肆疎楹高坐皓壁月皎層軒霞舒所以敷道義也前則端闈瞰野旁則脩廊納陛厨廩充牧居室閑安閱經籍于岩房息徒侶於輿寢棟宇延袤凡二百區蓋精誠之所憑寔邑里之勝槩也



今上嗣統像法大興禪師徒步神京對揚雲陛恩  
旨嘉賞賜號曰乾明禪院華題鳳篆降自慶霄聖  
日天光煥乎幽谷夫道之行也時與地并斯郡山水  
竒絕動植茂遂民情淳朴聖迹廻環非明主至仁  
不能恢清淨之教非禪師密行不能化嶮嶇之人  
示之以精脩祐之以戩穀變魯至道夫何遠哉鉉  
頃歲謫居此地思過三載閭里之見待也厚風物  
之愜志也深冥得喪之懷無憔悴之色及今三紀  
未嘗忘諸會禪師狀肇興之由圖不朽之作受簡  
秉筆欣然紀焉銘曰

陸香圃三間草堂藏書

教必有象待時而行道無不在因地而靈瀟岳穹  
崇皖川清泠鬱鬱佳氣宜為福庭有美導師為人  
由已人應物感風行良止闢此叢薄化為金地雲  
今上御名中開靈光四起君恩啟煥真聖回翔劉雷永遠  
接軫齊芳玄符靡測福應無方刊茲樂石用配無  
疆

大宋故天雄軍節度行軍司馬易府君

神道碑 并序

府君諱文贊字廣美豫章高安人也昔有晉春  
陵令雄位不克量忠以忘身祚流子孫繁衍荆楚



其世祿種德則故老家牒詳焉曾祖暇祖崇皆不仕妣鄒氏追封范陽縣太君從子貴也君符采爽邁質性深沈少遭時亂靜守家法剛而無犯勇而有節鄉曲之譽藹然于時有吳功臣劉公信節制豫章訓兵選士聞君名而召之君謂所親曰大丈夫當立功立事以大家門吾聞劉公剛毅倜儻有英雄之量必能申吾用也乃仗策從之甚見器重委以禦侮授之親兵出為爪牙入叅侍直外摠封略中清寇攘十年之間遂升右職劉公物故唐室中興君于是策名周行入典離衛于時戎事俯定國

陸香圃三間草堂藏書

容載穆君止于拊循士衆恭守官常時其寒燠均其勞逸勤慙微道廉察何留不矜出位之思甚得為將之體自宣威軍俾將累遷至左右天威軍都虞侯自檢校右常侍至檢校太保及淮甸倣擾都邑震驚以君為雄州刺史克建武軍使其理所即廣陵之天長縣也據衝要之地有十萬之衆綏懷訓練其俗用和會周世宗親總六師志平江右于是濠泗携叛揚楚摧陷君城小援絕堅守累旬世宗使降將郭廷謂臨城招諭君曰棄命以苟生不義勦民以全名不仁吾處中道而已乃間道表于本



朝備陳形勢且論遠慮還旨嘉納諭以割地之謀  
君即開城請罪世宗慰勞數四錫賚加等即授衡  
州刺史封太原縣子充天雄軍節度行軍司馬皇  
宗啟運優獎有加改道州刺史進爵為侯君以俯  
絳老之年有卻克之疾表求致仕優詔不許勤懇  
固請聽歸臨淮郡私第春秋七十有五開寶元年  
秋七月考終命三年九月葬于盱眙縣義和鄉西  
嵩里北團山禮也夫人會稽縣君謝氏亦江左之冠  
族作合君子克昭令儀箴管之勤夙彰于婦德湯  
沐之邑晚從于夫貴訓導諸子備全義方鍾蓬首

陸香圃三間草堂藏書

之痛哀而知禮受高堂之養嚴而有慈春秋七十  
有六太平興國二年秋七月終于臨淮私第某年月  
日合祔焉禮也有子五人曰延貴延祚延壽延義並  
克荷先業勤脩令名或叅藩郡或幹內職皆先夫  
人而歿唯第四子延慶獨稟粹和服膺儒教孝悌  
之至稱于州閭承顏先意侔曾閔之行居喪過哀  
有二連之風廬墓絕癸義感生植嘉木連理玉芝  
成叢遠近聞之莫不驚歎由是自前臨淮令拜大  
理丞及夫人卜葬違制臨赴為有司所劾有詔勿  
問聽解秩家居惟府君之生也臨戎以恩信理民以



慈惠事君全其節處身由其道故垂此家法推為  
慶門是生孝子以永世祀美矣哉鉉聞風而悅之故  
勒銘于神道其辭曰  
于惟易氏忠義之門德厚流光顯于後昆後昆之  
賢生我府君體道自居壯圖不羣輟耕永歎負羽  
從軍赳赳和門勇爵斯設靜則嚴重動則奮發臨  
難忘私處危全節名遂身泰考終無闕芄芄泗川  
永閔佳城哀哀孝子載感坤靈君恩貴寵樂石刊  
銘百代之下常流淑聲

故唐大理司直鄂州漢陽令贈衛尉少

陸香圃三間草堂藏書

卿樊公神道碑

公諱潛字仲明京兆萬年人也昔者虞仲垂孫謀  
之慶肇啓我封山甫昭補職之勤實大吾族或則  
游聖門而稱達者或則冠先籍而號真人豐沛功  
臣經營于大業南陽外戚佐佑于中興傳祀百世  
流光萬國而我之占籍世茂西京樊川之居抗衡  
韋杜曾祖澄以七世同爨孝德升聞大中制恩特  
加旌表峩峩石闕至今存焉祖偁濮州司戶參軍  
考諭光化中補池州至德令時天下已亂因家池  
陽終潤州金壇令公中和稟粹形氣器夙成好學之



勤本由天賦至孝之性不墜家聲始及弱冠併違  
怙恃絕漿泣血哀感州閭負土成墳終喪廬墓言  
于道者以為美談于時唐祚淪胥宗室稱制江淮  
之地不失舊章公以射策高等補潤州丹陽尉試  
吏之課書考為優廬陵之民古稱多訟加以畝籍  
違制亂獄滋豐守臣上言求拯其弊有命擇堪其  
事者聞公之能因而命之公既至乃相五土之沃  
瘠察夫家之衆寡采古之制酌今之宜創為新規  
衆皆悅服而復出械繫之者窮兩造之辭雪當死  
者數十人使還議賞增秩進等遷壽州壽春縣主

陸香圃三間草堂藏書

簿既而廬陵之政日理南楚之人聳觀久之以公  
為光州光山縣令加大理評事猶以前効也于時  
南北分裂縣臨敵境有爭桑之女多探丸之吏比  
閭之衆罕嘗寧居公于是糾集義勇分守要害推  
以恩信濟之彊明三載之中一邑用乂遷池州石埭  
令縣有大姓侵撓細民歲比不登俗乃重困公繩之  
以法董之以威豪右震悚相與逃匿于是啟請  
出官粟以賑之絕省力役以濟農功慈撫仁薰視  
之如子歲豐俗阜政用大成就加大理司直旌能  
政也秩滿遷鄂州漢陽令未幾遇疾壬子歲某月



日終于縣之正寢享年五十有七以丙辰歲某月日  
葬于池州貴池縣永泰鄉保靜里之原禮也夫人  
王氏鴻臚卿滔之女軒冕之族閨房之秀室家垂  
訓惠問風行長子若訥不事王侯自全高尚次子  
知古才藝畢給際會昌朝踐歷臺省交脩繁劇今  
為右諫議大夫河北轉運使揚名之業方茂顯親  
之數遂優公累贈秘書丞戶部員外郎衛尉少卿  
夫人封琅邪縣太君惟公生而岐嶷長而學問窮  
九經之奧旨綜百氏之微言率是古道施于為政  
行之以直守之以廉事親以孝飭躬以禮士元之

陸香圃三間草堂藏書

罷命屈於生前臧孫之忠慶貽于身后君恩飾壤  
世祿傳家咸京之舊表未堙秋浦之豐碑復立俗  
有遺愛吾無媿辭其銘曰

南山崇崇樊川溶溶剪商之烈補衮之功百代之  
後流光不窮爰有孝德克生我公猗歎我公顯允  
君子投此利刃行于百里有惠于民何必貴仕垂  
慶于後何必在己慶霄之澤自葉流根歿垂中佃  
生駕漁軒二子殊志俱大吾門優優愚谷英英諫  
垣九峯之下貴池之口覆芥馬鬣金雞玉狗民即  
桐鄉碑如峴首江水長流令名同久



洪州豐城縣李司空廟碑文

先王之制以勞定國以死勤事皆得祀之然則非通幽洞靈之士有驚愚顯俗之迹亦不能臻此也李君諱承鼎字大用其先隴西人中華因官遂家上黨先君諱神福避亂擇主來適維揚于時唐室崩離諸侯角逐吳武王奮柏文之舉我先君効闕張之用摧兗畧地所向無前功加于時慶鍾于後終淮南節度副使鄂岳招討使君即招討長子也幼而爽俊長而雄勇年始志學即從義旗善撫士卒生知韜畧勵若鷹隼疾如風電時稱虎子敵畏馬兒

陸香圃三間草堂藏書

以功累加檢校左僕射為橫衝裨將天祐丙寅歲從招討使秦裴平豫章叙功為最新附之地屬郡未賓明年命君領偏師平餘盜戈船先進羣帥後期山越霧集漢矢且盡同玄冥之沒若杜畿之沉享年二十有三諸將嗣事逋穢克清迎君之喪窆於洪州豐城縣揚子洲維君夙齡挺秀盡忠死節識與不識雜然推奇而英靈盼鑾若在左右如鄭人之驚伯有類吳俗之畏子文于是耆艾相率啟求立祠于墓側公議僉允因贈司空水旱禱祈無不即應鄉邑之際頻歲豐穰湍瀨無虞疾癘不作而



君之家門亦康寧蕃衍焉及今七十年矣雖神道  
恍惚不可備論而忠誠報應良足為勸猶恐年世  
綿邈流俗失傳或見操于越巫將受譏于淫祀嫡  
孫仁昭願以事實勸于貞珉鉉素與君諸子游復  
連姻戚披文相質所不獲辭初君之長弟諱承鼎  
為吳王之愛壻故國人咸謂君為伯氏而忘其官  
稱焉今用明白之銘曰  
嗚呼李君勇且有仁生徇國難沒為明神南楚之  
郊章江之濱祠堂奕奕像設僣僣薦信以特降祐  
于民龍泉太阿杪靈比珍衝斗之氣終天不淪

陸香圃三間草堂藏書

洪州道正倪君碣

君諱少通字子明其先千乘人也末葉避地徙居  
巴陵濯洞庭之餘波襲九嶷之秀氣儒風繼世貞  
節自持垂慶炳靈先才是出君風骨秀整襟懷坦  
夷幼挺高情即依道樾弱冠遐舉來游九江悅廬  
阜之名區得董君之故靜種杏之地榛莽森如慨  
然永懷誓復靈今上御名誅茅築室練行脩身闇然而彰  
千里斯應于時唐運告謝宗室代興江左被玄元  
之風二葉恢清淨之教君以清心苦節升聞于朝  
癸丑歲賜錢三百萬即所居建太乙之觀于是疏



鑿舊址草創新規悅以子來成之勿亟十有餘歲  
清宮煥然凡建四殿五堂重門兩序內外棟宇總  
百三十區像設儀衛莫不稱是力闢汙萊為良田  
者五百畝而餘賢之費有餘手植杉松成茂林者  
千餘根而甘靈之祥再降繇是牧守嘉尚道俗依  
憑為本州道正乃知太乙觀事享年九十有一體  
力康壯淳化元年秋八月八日子時怡然而化容  
貌如生初君自擇葬地于蓮花峯下即以二年春  
正月窆焉君性質冲淡不耀其光表率教門正身  
而已嘉賦詠善鼓琴龍鳳之形皆由手製山水之

陸香圃三間草堂藏書

操自洽天和所居之觀俯迎城郭登山之客必先  
造焉君將迎接待高卑如一絕迹朝市成樂林泉  
六十餘年慎終如始門人弟子先以慈孝為訓有  
若李延照蔣守龍等近四十餘人皆以孝行為時  
所稱親弟德規同學弟謝又能等叶力同心共復  
靈迹並先早世今謝君弟子王省昂嗣膺道任師  
孫錢知素繼知太乙觀事師門之盛論者美之鉉  
頃歲扈從南巡與師款接旬日傾蓋之分有如素  
交錢君以論譔見求不當為諱其銘曰  
太乙董君上帝之賓遺方眇邈奮迹荆榛倪師懷



慨復來清塵種杏之地林光再新異世神交豈其  
後身冥升自遠代劔非淪瞻言華表誰見千春刊  
銘翠琰道契攸親

徐騎省文集卷第二十七

陸香圃三間草堂藏書

徐騎省文集卷第二十八  
記

泗州重脩文宣王廟記

邢州紫極宮老君殿記

洪州華山胡氏書堂記

江州新建尚書白公祠堂記

洪州始豐山興玄觀記

金陵寂樂塔院故玄寂禪師影堂記

撫州永安禪院記

潤州甘露寺新建舍利塔記



重建宓子賤碑陰記

邠州定平縣傳燈禪院記

泗州重脩文宣王廟記

昔我先聖有周公之才無文王之時故憲章其道以垂萬世精神冥契夕則夢之是知千載旦暮蓋其道同也自時以降鴻儒碩生敷暢微言佐佑大化專一之志通于神明咸夢宣尼以著名寔斯文間作來者不誣國家彰灼神功在宥天下禮樂刑政舉百王之中典謨誥訓用三代之式文學之士靡然向風臨淮徐君名某字某弱而好學壯而有立

陸香圃三間草堂藏書

行躬乎族黨名聞于州閭脩辭立誠躬儒者之業博施濟衆秉義士之規隨計春官再不中選會長子宗孟郡亦舉秀才君以為名不可多取即欲退而求志無何夢游淮上條有淪胥之厄衆君子拯之而置於宣聖之堂儼然逢掖之容若奉緇帷之會寤而神聳益用兢懷聞者竒之勉以西上明年春冕旒臨御親較羣才崇朝之間父子俱捷蓋古今未之有也君歎曰天子廣孤平之路杜請謁之門先聖知之是有躬勉斯寔至德感兆鄙何有焉思欲昭答靈心丕顯



玄既惟茲泗上雄視百城學校之制我不在後王  
業伊始天下初平舟車輻湊之都郵傳旁午之地  
邦君丞掾日不暇給弦誦之所窺戶間然君白于公  
府願補闕政於是出家積鳩國工即舊謀新瞻  
星揆日乃建路寢乃立應門闕講論之堂設東西  
之序廣袤合度奢儉中規像設增嚴繪事加煥凡  
祭器制度皆圖于垣墉俾夫觀藝之徒橫經之侶  
居今識古虛往寔歸三代之風由斯而致也錄事  
參軍張君濬綱紀之任夙夜惟夤嘗與同僚及斯  
而歎曰

陸香圃三間草堂藏書

振舉廢闕公力未遑當属于好事君子非徐君不  
能也及茲締今上御名如宿契焉是知善人之言固非響  
答夫聖人之教也與天地嘗在將陰陽並運恍惚  
玄應昧者不知今徐君服之而成大名感之而臻  
介福咨爾後學可不勉欤金石之銘其無愧已于  
時歲次乙酉雍熙二年秋七月記

邢州紫極宮老君殿記

昔者老君伯陽憫大道之既隱傷周室之既微以  
為清淨無為道之本也非建言不盡能其意安上  
治民道之用也非設教不能永其成乃著書于函



闕以明清心之要授禮于仲尼以開垂世之統繇  
是教義之被于民如造化之漸于物賢者識其大  
不賢者識其小出入戰國經歷薄俗君君臣臣父  
父子子民到于今受其賜則二聖人是賴焉故並  
享明祀格于禹縣雖百世不能易也邢州紫極宮  
者唐開元中所立老君像則琢玉石以為之真靈  
所憑功用殊絕眸容竒表儼然若存瞻仰之徒莫  
不增肅王室剝亂郡國崩離三晉之郊戎馬孔棘  
崇堂墮落乃移像于北極殿之西偏數十年間不  
絕如線皇宋膺運百度惟貞道風載揚真侶咸萃

陸香圃三間草堂藏書

女道士陳體元江左右族夙挺玄符不從象服之  
華自結鳳羅之誓勤行匪懈真氣日滋乙亥歲伯  
氏從宦將之俱至崐崘知化汗漫與期郡守賢之  
授以宮任亦旣泣止慨然永懷嗟崇全之傾頽歎  
尊位之踈雜程工度費即舊謀新知州事段公思  
恭仙派分源諫垣舊德嘉其偉志助以俸金郡僚  
而下歡然風靡即宮之西序建老君殿三間材用  
必良工藝必精廣袤中規奢儉合度旭景升而丹  
采煥清風襲而爽氣生肅然仙都復覩靈境粵某  
年月奉玉像而處焉霓衣致虔羽蓋成列几筵



嚴肅香燭苾芬鐘磬咸和煙雲改色非至誠感召孰能臻此者乎練師之家葉從公清白垂訓仲兄前鹿邑令省躬秉直忤俗退而居貞季兄邢州書記長參學古入官和以接物積善之報宜生仙才鉉知二君歲久故美其事而紀于石某年十二月二日記

洪州華山胡氏書堂記

士君子承積善之慶服聖人之道治身脩心義之本也風行于家德之克也教被于俗人之周也疇克具舉吾其與之豫章屬邑世云舊里山水特秀

陸香圃三間草堂藏書

英靈所躔安定胡君藉于是君名仲堯字光輔奕葉儒學蟬聯簪紱魯門標舉煥列宿之華祖德韜映戢少微之耀至於我先人少好左氏春秋之學研幾索隱儒者宗焉及君之長克揚其業言斯出矣身則踐之揖讓周旋之儀孝友姻睦之行脩乎閨門之內形于羣從之間少長有禮絲麻同爨鄉黨率義人無間言然君以為上古之風可以馴致由六經之旨可以化成也乃即別墅華林山陽玄秀峯下今上御名書堂焉築室百區聚書五千卷子弟及遠方之士肄學者常數十人歲時討論講席無絕又



以為學者嘗存神閑曠之地游目清虛之境然後  
粹和內充道德來應于是列植松竹間以葩華涌  
泉清池環流于其間虛亭菌閣鼎峙于其上處者  
無數遊者忘歸蘭亭石室不能加也又按圖牒云  
昔陶丘公李八百皆脩道于此是知人境相得其  
道乃光勤而行之古猶今也鉉欽羨其事道阻且  
躋故述斯文以垂不朽年月日記

洪州新建尚書白公祠堂記

大丈夫處厚居寔據德依仁豈徒潔身將以濟世  
故著于事業發于文詞而後功績宣焉聲名立焉

陸香圃三間草堂藏書

蓋有其實者必有其名是以君子恥沒世而名不  
聞也若乃格于穹壤漸于蠻夷大則藏于金匱石室  
之書細則誦於婦女稚孺之口則古今已來彰灼  
悠久未有如白樂天者不其異乎故神明相之攸  
居不傾黎氓懷之餘風不泯士大夫神交道親若  
旦暮焉尋陽古郡昔公謫官之所綿祀二百市朝  
屢變而司馬聽事之室巋然獨存斯益異矣聖運  
光啟崇古尚文三代之風傳遠萬里禮部郎中江  
南轉運使張去華述職按部幸來是邦弭節城闔  
攝齊堂奧以為先賢所舍邑里具瞻與夫元規之



樓惠遠之社崇飾祇薦吾何後焉太子中允知州  
事梁君翊贊善大夫通判州事羅君或皆叶規同  
心相視莫逆政有餘裕府多羨財即舊謀新創為  
祠宇傳寫廬山之遺像寘于北墉棟宇深嚴門序  
奧秘肅然廟貌想見其人凡游居之徒仰高山聆  
遺韻薦誠觀薦結轍於斯禮不云乎禱祠古之卿  
士有益于人者觀樂天之文主諷刺垂教化窮窮  
理本達物情後之學者服膺研精則去聖何遠其  
為益也不亦多乎而祝之固其宜矣某昔遊廬岳  
獲拜儀形今塵騎省遙聞締御名喜儒宗之不墜嘉

陸香圃三間草堂藏書

使者之得人故作斯文勒于貞乃年月日記

洪州始豐山興玄觀記

聖人之言道無不在若乃域中歸其大萬物恃之  
生鴻化玄造無德而稱已至于顯神道之教挺方  
外之朝反之于身以固其本清心煉氣保精嗇神  
飡霞茹芝脩用者殊軌御風乘景游集者無方蓋  
真階仙品之有差故洞天福地而區別奇篇所紀  
靈境可尋豫章始豐山者案圖牒第三十七之福  
地也爾其穹隆蹇產干霄蔽日凌空瞰野之勢嵌峯  
穴幼窈蒸雲泄雨儲神宅怪之奇陰林脩幹材用



之所生也周飛湍激流利澤之所及者遠紫煙白  
霧隱映而紛霏靈風爽氣蕭寥而披靡醮享之殿  
歷代相因爰有興立之觀是為薦誠之地土德云  
季三災迭興市朝貿遷堂今上御名隳頓幾歎遼城之鶴  
常棲楚幕之烏若夫真氣所憑神靈攸相物無終  
否物不遠人道士聶紫庭襲玉筭之地英追九仙  
之夙契以勤行為志業以訪古為師資歲在玄枵  
來游此觀願瞻祠宇慷慨傷懷徒侶躬請遂膺其  
任積行所應至誠易通游居之人莫不信奉以為  
興作者古人之所慎因循者前哲之所宗是備制

陸香圃三間草堂藏書

度何必侈大于是補其闕而葺其壞窒其隙而扶  
其傾集瓴甃塹之工加巧鏤丹雘之飾瓌臙鏤  
檻朱戶金鋪深沈靡迤虛明藻麗百年舊製一旦  
惟新日就厥功十稔而已已不病于費人不知其  
勞用此脩真真其焉往又以方志漏畧碑頌堙沉  
使夫來者何所宗仰謂余為好道者故求我以文  
是用直書以觀成績淳化元年夏六月記

金陵寂樂塔院故玄寂禪師影堂記

士有切問強記以脩其內和光退節以晦其外而  
人自仰之名自歸之不知所以然而然見之于玄



寂禪師矣師名澄玘姓陳氏番禺人既生而孤天骨奇秀岐嶷之態有異常童常端居靜念如學道者七歲復失所恃母臨終以托其姑曰此兒幼有奇應法當出家倘果斯願吾無恨矣年十一歲遂詣本郡從師十七歲韶州南華寺正度于是造詣先達請益質疑歷遊名山無遠弗届不違類于顏子啓予同于卜商丁未歲來止舒州山谷寺徧閱經論論師門之學無所不通然未嘗為人言也是時李唐二葉佛法大興凡聚徒講學者所在表之以為長老禪師徇狎鷗之志慕爭席之風雖衆人

陸香圃三間草堂藏書

與居而羣望自集道俗躬請抗志不從郡守周公因人之心封章上啓嗣君嘉賞以詔書命之周公延至郡齋親為致禮師不得已乃攝齋即坐音詞宣朗僚吏屬目士庶咸歡還處精廬宴居如故丁巳歲避難南渡止于廬山嗣君名致建康累徵乃至迭處名寺咸敷講席恩禮優渥賜號玄寂禪師時之名流無不景仰至于誘進後學開薰真詮激勵憤排皆得所欲乾德五年冬十一月終于建康龍光禪院春秋六十有一後主遣中使護葬贈送甚優葬于都城東南隅鳳臺鄉門人弟子廬于墓次誅



茅今上御名宇遂成道場儼設靈儀式觀遺愛鉉頃自禁  
掖放逐舒庸閉關却掃不豫人事時遊瀟岳因獲  
今上御名止容貌閑暇議論平淡言意相得有若舊交雖  
慙方外之期自叶忘形之契一生一死已隔當年  
谷變陵遷復悲于陳迹弟子嗣昭等永懷遺範願  
勒貞珉因述斯文庶申夙分年月日記

撫州永安禪院記

教之大者其仁遠利之博者其報豐自三代以還  
百家並鶩炎靈之後釋氏特隆經法之盛參乎先  
聖祠宇之設廣于虞庠不知所以然而然非言象

陸香圃三間草堂藏書

所及已撫州郡署之左一里而近有禪院焉乾符  
中署曰寶國天祐中改名永安方志失傳莫知肇  
興之始高人造處咸為宴坐之場夫經像之所居  
苾馨之所薦必將據郡國之形勝襲川原之氣象  
斯郡也搃楚越之都會斯院也浸漳汝之清流逸  
少康樂江左名士而墨池經臺介乎比閭麻姑南  
真丹臺上列而仙壇閑館峙乎封域閑閣相望鐘  
磬交音神靈之所依憑煙霞之所韜映爾其棟宇  
之狀也則赫赫乎顯敞眈眈乎深嚴黼藻成文磨  
礱盡妙層樓對峙脩廊四通列講肆于崇堂安衆



士于奧室動有擊蒙之益靜有寧體之娛儲峙必  
豐器用必給四方學者至輒如歸考績程功則往  
持禪師義韜之力也韜公道學精詣慧心朗悟以  
濟衆為務以興教為懷少游名都歷訪先達晚栖  
臨汝自闢師門甲申歲來詣京華褐衣請見對揚  
玉宸躬奉天言論難所及辭義響答聖恩嘉矚贈  
以紫衣登門之徒莫不增肅韜公以斯院制度崇  
麗脩奉精嚴金石闕如何以後示惠然見願求我  
以文辭讓不獲因為之記年月日記

潤州甘露寺新建舍利塔記

陸香圃三間草堂藏書

維皇宋二葉改元五祀潤州丹徒縣令王紀改築  
縣墻掘地得石函驗其刻文梁大同五年道人法  
序瘞真身舍利于此函中銅龕一龕中銀合一合  
中銀瓶二舍利七粒存焉而銅龕復有刻文則唐  
貞觀十二年再加營奉掌役者張遇獲之以獻遇  
也感貞應之在已念妙道之可脩因投郡之慈雲  
寺削髮為沙門易名聞真精心苦行誓復前迹廣  
募衆施疇咨協心數年之間克果其願即以端拱  
元年夏四月八日遷致于郡之甘露寺東隅建浮  
屠焉獻狀而來求志其蹟粵



聖人在上欽若靈心政無不脩神靡不舉玄旣交  
感坤元效珍用能使幽瘞之質煥然景彰騫崩之  
迹蔚然雲御名然則澤及微隱福被含生其可知也  
是郡也揚州之都會京口之重鎮六代之風流人  
物綜萃于斯三吳之山川林泉肇發于此高深自  
改氣象嘗存是寺也北固山之陰崖贊皇公之遺  
迹崢嶸飛閣迴瞰滄江邈迤岩房周行數里植之  
作遠迎雲臻故真師因人之心相地之勝獲此空  
隙建茲崇封材用工役必求善良規模制度必據  
經法其高七十尺其周二十步八隅瑩立五盞凌霄

陸香圃三間草堂藏書

冠星珠于觚稜海日光照圖雲氣于赫撩宿霧常  
栖中巖眸容肅然月滿旁績靈變煥若霞舒浙居  
之徒莫不稱歎愚嘗見釋氏子為此役者多矣如  
真師者其涉道也淺其居處也卑上無許史之託  
下無猗陶之助苦節以感物績微而著功不愆民  
不愆素而能事以立亦可尚也故嘉而志之端拱  
二年二月一日記

重建宓子賤碑陰記

單父縣宓子賤舊碑賈至文梁耿書天寶十年四  
月四日柳載建始致于故縣北隅琴堂之上光化二



年以縣為郡署縣令李知傑移理于今所碑亦隨  
從措置不謹風雨所摧因折為數段扶置垣墻之  
間至今八十年矣皇宋撫運書軌大同人文化成  
清淨為理縣令毛君名庶幾越自江左來撫斯民  
見賢思齊好古博雅以為宓子之化人猶不忘賈  
君之文世共稱賞若棄之而不脩非所以訓民事  
神也于是再建隆碣重書舊詞以鉉嘗學篆籀見  
求運筆梁氏之迹本自非工仍為倒薤之勢非八  
書之正也而又字體譌俗文詞舛誤今以賈氏集  
校而正之遠擬秦李斯改為玉箸立于宓君之祠

陸香圃三間草堂藏書

庭事之宜也以改作之意附于碑陰云太平興國  
五年正月二十日記

邠州定平縣傳燈禪院記

乾維巨屏寔曰邠郊其地險固其氣剛勁被宗周  
信厚之澤詠王業艱難之風是故人知徽福之方  
俗嚴慈氏之教精廬靜宇隱麟相望定平縣傳燈  
禪院者帶位署之左方據郭邑之勝勢四面環其  
趾湮水盪其胷却倚崇岡爰標龍尾之號上寫寒  
澗仍有天河之稱藹爾鮮原鬱然佳氣昔居唐室  
之季四海崩離中和四年有禪師從一者挺秀宗



門從師臨海避難高舉擇地遐征萬里而來稅駕  
于此相其爽塏有志盪相羣心翕然助成其事買  
地築室者咸集橫經跪履者亦臻十年之間百堵  
斯建守官嘉尚請命于朝景福二年詔賜題署天  
光所及道譽彌高一公化去弟子佐範克嗣其業  
範之弟子知信復繼其任守之以恪加之以勸感  
召益多法事增廣殿堂像設靡不莊嚴儲峙器用  
無乏供億而經典猶闕講誦弗聞以為居今識古  
者存乎書觀象得意者存乎言金匱石室之宏規  
名山京師之故事此而不務何以為能乾德四年

陸香圃三間草堂藏書

秋肇啓精誠指期繕寫邑人石遷等聞風而悅叶  
比其謀日就月將惟力是視卷以緗秩貯之琅函  
邑人高玘奉其家山以備今上御名室采伐之備夫役未  
克俄而暴雨猥至山溜奔激屹然巨石自至院前  
取以給用宛契心匠雖廬岳神運之殿石頭後渚  
之梁感通冥符無以過也既而信公復沒以屬弟  
子令熙熙也遵行弗敢失墜而民非兆萬俗空猗  
陶漸以化之靜以俟之二十許年猶未訖事會中  
使王君名素分推管之職督闕梁之征歸與于終  
率額衆力于是簡牘几閣即日僇工俾下帷鑿壁



者得肆其勤研精索隱者不愆其義真風無泯介  
福來臻繫高士四世之勤垂本宗百代之憲宜其  
篆刻金石永示方來知余有好善之心專稽史之  
學求我是用直書于時歲次壬辰淳化三年春三  
月記

徐騎省文集卷第二十八

陸香圃三間草堂藏書

徐騎省文集卷第二十九

墓銘

大宋左千牛衛上將軍追封吳王隴西公墓誌銘

大宋右千牛衛上將軍隴西郡公李公墓誌銘

大宋故處士贈太子少師李公墓誌銘

大宋故尚書戶部郎中王君墓誌銘

大宋故尚書兵部員外郎江君墓誌銘

大宋故陳留縣主簿贈太子中允李府君墓誌銘

大宋左千牛衛上將軍追封吳王隴西

公墓誌銘 并序



盛德百世善繼者所以主其祀聖人無外善守者不能因其存蓋運曆之所推亦古今之一貫其有享蕃錫之寵保克終之美殊恩飾壤懿範流光傳之金石斯不誣矣王諱煜字重光隴西人也昔庭堅贊九德伯陽恢至道皇天眷佑錫祚于唐祖文宗武世有顯德載祀三百龜玉淪胥宗子維城蕃衍萬國江淮之地獨奉長安故我顯祖同膺推戴淳耀之烈載光舊吳二世承基克廣其業皇宋將啟玄貺冥符有周開先太祖歷試威德所及寰宇將同故我舊邦祇畏天命貶大號以稟朔獻地圖而請吏故得

陸香圃三間草堂藏書

義動元后風行域中恩禮有加綏懷百世魯用天王之禮自越常鈞鄗存紀侯之國曾何足貴王以世嫡嗣服以古道馭民欽若彝倫率循先志奉蒸嘗恭色養必以孝賓大臣事耆老必以禮居處服御必以節言動施舍必以時至于荷全濟之恩謹藩國之度勤脩九貢府無虛月祇奉百役知無不為十五年間天眷弥渥然而果于自信急于周防西隣起釁南箕今上御名禍投杼致慈親之惑乞火無里婦之辭始勞因壘之師終後塗山之會太祖至仁之舉大賚為懷錄勤王之前効恢焚謗之廣度位以上將爵為



通侯待遇如初寵錫斯厚

今上宣猷大麓敷惠萬方每侍論思嘗存開釋及  
飛天在運麗澤推恩擢進上公之封仍加掌武之秩  
侍從親禮勉諭優容方將度越等彛登崇名數鳴  
呼閱川無捨景命不融太平興國三年秋七月八日

全上  
御名

疾薨于京師里之第享年四十有二

皇上撫几興悼投瓜軫悲痛生之不逮俾沒而加  
飾特詔輟朝三日贈太師追封吳王命中使泣葬  
凡喪祭所須皆從官給即其年冬十月日葬于河  
南府某縣某鄉某里禮也夫人鄭國夫人周氏勲

陸香圃三間草堂藏書

舊之族是生邦媛肅雍之美流詠國風才實女師  
言成閭則子左千牛大將軍某襟神俊茂識度淹  
通孝悌自表于天資才略靡由于師訓日出之學  
未易可量惟王天骨秀異神氣清粹言動有則容  
止可觀精究六經旁綜百氏嘗以為周孔之道不  
可暫離經國化民發號施令造次于是始終不渝  
酷好文辭多所述作一游一豫必以頌宣載笑載言  
不忘經義洞曉音律精別雅鄭窮先王制作之意審  
風俗淳薄之原為文論之以續樂說所著文集三  
十卷雜說百篇味其文知其道矣至于弧矢之善



筆札之工天縱多能必造精絕本以惻隱之性仍  
好竺乾之教草木不殺禽魚咸遂賞人之善常若不  
及掩人之過惟恐其聞以至法不勝姦威不克愛  
以厭兵之俗當用武之世孔明罕應變之畧不成  
近功偃王躬仁義之行終于亡國道有所在復何  
媿歎嗚呼哀哉二室南峙三川東注瞻上陽之宮闕  
望北邙之靈樹旁寂寂兮迴野下冥冥兮長暮寄  
不朽于金石庶有傳于竹素其銘曰

天鑒九德錫我唐祚綿綿瓜瓞茫茫商土裔孫有  
慶舊物重覩開國承家彊吳跨楚喪亂孔棘我恤

陸香圃三間草堂藏書

疇依聖人既作我知所歸終日靡俟先天不違惟  
藩惟輔永言固之道或汙隆時有險易蠅止于棘  
虎游于市明明大君寬仁以濟嘉尔前哲釋茲後  
至亦今上御名亦見乃侯乃公沐浴玄澤徊翔景風如松  
之茂如山之崇奈何不淑運極化窮舊國疏封新  
阡啓室人論之謀卜云其吉龍章驥德蘭言玉質  
邈爾何往此焉終畢儼青蓋兮袞袞驅素虬兮遲  
遲即隧路兮徒返望君門兮永辭庶九原之可作  
與緱嶺兮相期垂斯文於億載將樂石兮無虧

大宋右千軍牛衛上將軍隴西郡公李公墓誌銘



公諱從善字子師隴西成紀人唐室之諸孫元和  
之近屬譜牒詳悉此不具陳若夫人祚之德大運  
有時而極積慶之祀百世無得而踰必生克肖之  
賢以承有後之應保姓受氏公實宜之昔者土德  
既微羣雄角立維我顯祖奄宅舊吳延祚四紀傳  
國三世公以天屬之愛膺寶王之封始在膠庠已  
有名望姿儀秀出文學生知仁孝極于事君謙抑  
形於下士中外之論翕然稱之由是受任六官交脩  
庶職彌綸舊典諮訪老成恪居無違所至皆理于  
時聖人出於中土正朔及于四方維我先君祇畏天

陸香圃三間草堂藏書

命受盟請吏息民弭兵玉帛交馳冠蓋相望公親  
則介弟位則中台獨奉絲綸留參槐棘元戎駟牡  
分建節之權玄冕九章奉侍祠之列朝獎旣厚臣  
誠益恭後凋之葉無渝萬頃之陂自若故得全名  
節于危疑之際保恩顧于終始之間環衛迭遷寄  
任增重盤桓必解師律以貞十有餘年其志如一  
嗚呼修途方騁景命不融春秋四十有八雍熙四年秋九  
月九日薨於通許護軍之廨詔輟朝一日賻絹百匹  
即其年冬十月十三日葬于開封府開封縣吹臺鄉  
蘓里村太夫人凌氏之塋禮也前夫人徐氏繼室



周氏並早卒皆有肅雍之德窈窕之華宜家治內  
盡其規魚軒象服昭其盛子十四人仲顛仲翊仲  
衍仲華仲雅仲穎仲寧仲簡仲彬仲文仲猷仲玄  
仲羲仲端女十四人慕英懿卿奉蘋蘊蘭正容茂  
節穉仙惠昭如賓道崇鳳兆幼貞閨秀季真或嬪  
于盛族或待禮未行惟公生于深宮特稟異氣謙  
而得禮和而執中容納直言賓延素士經歷夷險  
雅度不渝大年未登終古同歎鉉登門斯久屏願  
殊深永惟知己之恩願表為陵之谷其銘曰  
真源引派仙李垂芳寔生我公金玉其相非禮勿

陸香圃三間草堂藏書

動出言有章忠信以濟終然允臧三代之姓倏焉  
為庶九萬之程溘然中路吹臺北峙浚川東注不  
植刺草長瞻宰樹大雅君子隴西公之墓

大宋故處士贈太子少師李公墓誌銘

并序

道之泰也賢人振衣而濟物時之否也君子括囊  
以獨善其有脩之家而孚教于俗無其位而博施  
於人角立傑出蓋亦難矣公諱某字某庭堅邁德  
百世流光源長派遠蕃衍郡國今為常山真定人  
也祖某贈太子少保考某贈太子少傅公即少傅  
第三子也幼而岐嶷長而純孝承顏先意寔稟生



知七歲丁太夫人憂泣血絕漿殆于毀滅宗族驚  
異謂之神童事兄弟人莫能間先是唐之叔世燕  
趙多虞故我先人累世貞遜公亦奉家法咸樂丘  
園躬稼躬本儉以足用百年之業是享素封既而  
天下兵興生民益否公盡出私積以均有無為食  
以救饑歉微嗟來之謂然券以賙之絕非市義之  
求遠邇之人全濟甚衆懷仁向義者撫之既無矜  
色背惠棄信者接之亦無愠容襟懷曠然莫窺其  
際慈愛惻隱視人如傷昆蟲草木無所天闕故閭  
里率化風俗以和崇儒尊道墳籍未嘗釋手喜酒

陸香圃三間草堂藏書

好客醒醉必與之同嘗以為芳華易凋光陰不駐  
發于吟詠以寄其情藜杖角巾所至皆適是非擾  
擾若蚊蚋之過前愚智憧憧若螺蠃之在側至矣  
哉古之達者也開運未有晉失御獫狁孔棘公挈  
家南渡居於胙城伯氏飛龍府君時在滎陽召公  
同處廣順三年夏六月日終于鄭州私第享年四  
十有三夫人清和郡太夫人張氏以謝女之淑德  
徇萊妻之高節宜家理內令聞藹然威姑性嚴諸  
婦皆聳夫人順而得禮勤而無怨晨夕參侍獨被  
深慈凡飲食藥餌須經夫人之手然后即御長妣



亦頗嚴勵夫人事之如姑或被誚責怡聲致拜由是閨門之內不肅而成及罹恭姜之哀更全孟母之訓諸孤稍長教以學文為之擇師友為之致經籍凡學舍賓館之所須者輟衣食捐簪珥以奉之躬截髮之惠俾其親仁引斷織之言誠其中廢故諸子皆立門戶如初越建隆二年秋七月十日終於鄭州私第享年四十有五長子格大理評事次子至吏部侍郎兼秘書監吏部以文學冠時擢高第于聖鑒以才業膺世參大政于中樞以疾告罷復為少宰天子秘御書于中禁命我專掌式恢文教時人榮

陸香圃三間草堂藏書

之先是少師之葬也世猶多故禮或有關及夫人祔也塋地逼隘介於羣冢之間君子曰非安神之宅也即以端拱元年冬十二月十三日改卜于鄭州管城縣某鄉里原禮也鉉鄉里遼賈聲塵致睽竭來京師獲與吏部游處覩于公高門之盛知臧孫有後之由公之行實皆聞于輿論或得於家老梗槩而已不能備舉也金石之紀宜在鴻儒惠然見願辭不獲命謹為銘曰

天生賢人以佑生民生民數奇賢人隱淪脩之于家富以其鄰里閭率化宗族歸仁樂天知命全和保真鳳皇于飛



以况嘉耦伯鸞之妻士行之母婉淑宜家嚴慈啓  
後金鈎鵲印魚軒紫綬令聞無已流光不朽刻此  
貞珉高深共久

大宋故尚書戶部郎中王君墓誌銘

君諱克貞字守節其先太原人也緱山之胄本固  
源長淮水旣微枝分派別所居占籍吳楚為多今  
為廬陵人矣曾祖某不仕祖某贈吉州別駕考某  
屯田郎中君弱不好弄幼善屬文風骨峻整器度  
閑雅年未及冠名聞於時自唐室之季詞場道喪江  
左延祚復覩舊章翰林學士江君文蔚典司春官

陸香圃三間草堂藏書

詳求藝寔取人至寡杉文尤詳君一舉擢第首冠  
諸子時人以為追蹤元和之際明年以秘書省正  
字釋褐寓直樞近專掌文翰之任措辭典雅叙事  
詳審守位以慎當官以勤由是二十餘年累遷至  
中書舍人樞密副使未嘗他任求之前載亦為異  
矣及末葉多故時政寢衰唯吾守道中立不涉浮  
議及宗國淪喪策名天朝自太子中允歷戶部兵  
部二員外郎禮部戶部二郎中典漢滑襄梓四州  
事皆以寬簡為務仁愛推誠當時之不名臣僕長  
孺之擇任丞吏是故民以之睦政以之脩端拱二年



秋自梓潼還至京九月十八日御名疾終于興州之傳舍  
享年六十明年某月日葬于揚州某縣鄉里原禮也  
夫人隴西縣君李氏早亡無子女一人許適鹽鐵使諫  
議陳某惟君有文雅之用有周慎之誠言行相顧  
光塵不異奉職無廢舉在私無墮容歷夷險而不  
廻保終始而無吝初君始從鄉薦余已典綸誥謬  
為先達屢辱請益及余消長在運而君金石不渝  
古人之風于是在矣已悲深谷更閱逝川發為哀  
辭識彼泉戶銘曰  
猗嗟夫君心冥氣純英英達士疊疊詞臣不愆于

陸香圃三間草堂藏書

位有惠于民无悔无咎不緇不磷吉往凶歸道悠  
運促旋自九折復于左轂駟馬悲鳴市人行哭邈  
矣彼蒼云何不淑悠悠邦水隱隱崑岡慈親臨奠  
令季持喪旁羅宰樹下闕玄堂郊原晦靄雲日冥  
茫痛光塵兮永已念蘭菊兮徒芳

大宋故尚書兵部員外郎江君墓誌銘

君諱直木字子建尋陽人也廬九之地時生俊才  
忠壯之族世著南國末葉埋替與時汙隆儒墨退讓  
垂為家法曾祖晁祖考騰皆不仕伯父夢孫與  
先君同隱廬山以經學大義自娛伯父後膺宰府



之辟自求弦歌之任報政嚴太復隱舊山孝友貞  
清鄉里推服先妣李氏方娠夢神人授以直木一  
本寤而生君故取名焉幼而穎悟生知經義七歲  
以神童擢第未幾丁先君憂至性孺慕宗族稱歎  
孜孜色養無復宦情學古屬文惟日不足爰及弱  
冠遂以詞藝知名其為文清淡簡約自為品格尤  
長于古風詩家居凡二十五年親友躬諭乃從常  
調釋褐太常寺奉禮郎轉江都縣主簿直以事上  
不失其恭勤以率下卑舉其職民從其化吏服其  
能府尹陳玄藻縣令路儀皆恃才傲物獨推重于

陸香圃三間草堂藏書

君以為不如也改江夏令其理如初鄂帥何洙武勳  
致位性復暴桀亦加優禮異于餘人常視君舉止  
迂緩車服朴野輒怡然而笑每責諸寮屬曰君輩  
稱為儒生不學江令也秩滿改蘄州黃梅令議者  
以為屈君以鄉曲俯接欣然而往踰歲遷歙州黟  
縣令會宗屬封建妙選府寮授君記室之任處平  
臺複道之地列璫簪珠履之間清節素風凜然不  
改正詞直道動必循規府公甚重之十有餘年累  
遷至水部員外郎賜緋而記室如故庚午歲府公  
奉使天朝留鎮兗海授君泰寧節度判官檢校金



部員外郎數年遷司門員外郎判刑部今上元年  
加朝奉郎先君贈大理司直先妣追封隴西縣太  
君視事三載求外任以自效上以君恭勤詳慎宜  
久其職拜兵部員外郎仍兼刑部享年六十有四  
居常康寧微病數日奄從物故時太平興國五年  
冬十二月二十八日也即明年二月十日葬于開封縣汴陽  
鄉豐臺里禮也前夫人封氏今夫人太原縣君王氏  
皆有窈窕之質幽閑之操叶此貞節蔚其門風長  
子敬京兆府醴泉縣主簿次曰用成用明用澄用  
康用平用文用寧女二人曰慕昭用貞君生于季俗

陸香圃三間草堂藏書

世全素業性純貌古行潔文高守道安貧非禮不  
動未嘗忤物亦不隨流真所謂鞠躬君子者矣夙  
惠之性稟于天質年十餘歲侍伯父食不過園蔬  
而已伯父戲之曰啜白薤之羹淡而無味君應聲  
對曰齧紫茹之蒂鏗爾有聲人知其當大成也余  
始聞其名晚乃識面察言觀行重其為人藩房見  
選余所薦也亦既稱職頗嘗自多丙寅歲與君俱年  
五十歲日會飲酒相與賦詩君先就曰學易寧無  
道知非素有心余遂不復作也君有文集二十卷  
嗚呼契闊夷險咨嗟年髣一生一死孰克忘情聊



存挂劍之期故有刊銘之作其詞曰  
嗚呼江君世濟其名生今之俗為古之人閨門侃  
侃鄉里恂恂其寔如秋其華如春握蘭有裕伏閣  
惟勤考終歸全邈焉清塵葬于所沒古稱達者浚  
水長源夷門迴野徒挂寶劍空馳白馬勝氣如存  
逝川不捨勒石垂芳千載之下

大宋故陳留縣主簿贈太子中允李府

君墓誌銘

并序

府君諱某字廣途其先隴西狄道人仙源帝系蕃  
衍萬邦隴西一族獨為禹甲中葉從宦因家雍丘

陸香園三間草堂藏書

今為縣人曾祖巢祖禮皆不仕考洪蔡州長史府

君清明稟氣才智夙成幼而屬文已洽時譽既志  
學通左氏春秋未冠即為講說橫經請益虛往寔  
歸微言與義別為編錄年二十三舉進士再不中  
第後唐天成初宗人璩為太宗正見而器之曰王  
室多故吾道未先得祿而已何必是也乃表為屬  
吏委以牋奏丞相鄭公珪奇君之能特除蔡州汝  
陽主簿奏課連最改冀州南宮主簿于時期運告  
謝河朔多虞君內撫疲羸外給軍旅民安事集郡  
國稱之澤潞節度侍中馬公存節聞其名辟為管



記薦章連上制命弗臨君知命之不遭乃謝病而  
退閉門却掃以名教自娛漢氏初基羣心改屬親  
友躬諭復詣京師直道而行焉往無吝又為興平  
河東二主簿秩滿以常調當遷望令時皇運肇啓  
多士徇名君之次子巨源已從鄉薦獲知于尚書  
陶公公時典選事謂曰丈人才高運否遭廻下位  
區區一宰未足為光孰若復佐近畿以便吾子之  
舉事不亦可乎乃除陳留主簿乾德六年春三月  
四日終于縣署享年六十有八夫人追封琅耶郡太  
君王氏緱山仙派河洲懿德婦道以順家人用嚴

陸香圃三間草堂藏書

睦族惟和訓子由義以乾德三年月日先逝俱權殯  
于縣之乾明寺至雍熙三年二月日合葬于開封府  
開封縣吹臺鄉蘓邨禮也子五人長巨舟早亡次巨源  
擢進士第今為都官郎中盜鐵副使次巨載以疾家  
居次巨川巨卿二女皆早夭惟君懷恬淡之性秉貞介之規  
孝于奉親仁以睦族雅志宗道餘力攻文有孔墨之  
志無管樂之過淹翔末路從容自若所至之處輒  
茅齋延高士談宴終日曾無倦容嘗謂諸子曰吾志在  
大名非欲夸世欲行吾道尔時命不偶古則皆然汝輩宜  
勉成吾志也而巨源果能奮竒藻捷高科際會聖期騫



翔臺閣長才利刃應用忘疲追遠之澤漏于泉卜宅之儀由乎禮積善之家斯在大名之應何慙仁人孝子正當如是鉉嚮風斯久傾蓋甚歡不朽之文惠然見託賢賢善善翰墨之任也故采家牒勒于貞珉其詞曰  
才高位下古寔有焉積善餘慶神寧捨旃邈哉李君一時之賢其身則屈其道斯全餘慶伊何實有令子奉之以孝葬之以禮屢輅同載佳城雙啟九原與歸三廟而祀遺愛被俗沒而不忘貞珉頌美久而彌芳阡如京兆地即桐鄉綿綿瓜瓞永永流光

徐騎省文集卷第二十九

陸香圃三間草堂藏書

徐騎省文集卷第三十

墓誌銘

故唐慧悟大禪師墓誌銘

故唐衛尉卿保定郡公徐公墓誌銘

故唐水部郎中崔公墓誌銘

故汝南縣太君周公夫人墓誌銘

大宋故亳州蒙城縣令曾君墓誌銘

故唐內客省使知忠義軍尚公羨道銘

故鄉貢進士劉君墓誌銘

故唐慧悟大禪師墓誌銘 并序



士有佩服聖道闡揚師訓進不累于軒冕退不滯於丘樊務勤身於濟衆不養高以絕俗其唯仁人矣大禪師名冲煦字大明姓和氏昔者帝堯光宅天下我祖世掌天官保姓受氏冠冕百代在漢則調鼎之重在晉則專車之賢未葉湮沈徙居固始先君從郡豪王氏南據閩方今為晉安人也大禪師生稟異氣幼挺玄機年十有五詣鼓山興聖國師出家即具戒品博覽經史雅好文詞郡多俊秀咸見推仰證無為之理演不言之教綽為先達端然妙門居城北之昇山于時王氏衰淪亂臣專恣淫

陸香圃三間草堂藏書

刑飛語虐及善人大禪師杖策去之適臨川郡中書令宋公齊丘作鎮南楚頗尚空玄聞師之來遠加延納言意不合拂衣而行下至池陽郡守王公繼勲鄉國之舊賓禮甚渥時季唐二葉像教方興嗣君聞其名召與之語移晷而罷眷矚殊優命居光睦禪院復遷長慶道場俾與儲貳遊處實羽翼也後主即位恩旨加隆特賜法智禪師之號廬山開先禪院者嗣君所創真容在焉命大禪師居之精嚴脩奉之儀以申因極之感居數年召還建康止報恩禪院加號慧悟大禪師名其所化曰智度



堂精廬櫛比選勝而處禮秩之數有踰于前出則  
居奉先道場入則居淨德內寺開寶七載夏六月  
寢疾旬餘乃大衆與論生死之理十九日清旦上疏  
告辭後主遣使問之至則化矣享年五十有九住  
法四十四年即其月二十五日從西域之禮收靈骨  
葬于鍾山之陽禮物官給中使監護至某年月日  
弟子省才遷于廬山某所遵理命也大禪師風骨  
秀整機神穎悟博該衆藝綜以玄談王公大人咸所  
欽尚鉉非學釋氏者不能言其道業徒以頌蓋之  
分久要不忘今京師復興與才公胥會才公以文藝

陸香圃三間草堂藏書

精敏見重于時永惟嚴師之義願刊不朽之迹嘉  
其偉志為作斯銘銘曰  
慧悟禪師釋雄之奇有文飾已有道膺時生延世  
寵沒有遺思歸舟翩翩九江之涓廬峯勝境蓮社  
餘基門人稟訓遷神于茲衰翁懷舊勒銘誌之蘭  
菊無絕高深與期

故唐衛尉卿保定郡公徐公墓誌銘

公諱迪字昭用東海人也仁義之胄繁衍萬邦別  
族于太史者十家因封而占籍者四郡而有郟之  
邑鉅人寔多著于簡編可以揚推唐室云季天下



崩離江淮之間獨為漢守惟我大父首從義兵受  
遺戡難同伊尹之相太甲字孤立後如有虞之保  
少康故得勲銘鼎鐘世享茅土連姻合族與國存  
亡考諱知詢為江西節度使公生于郡解方孩而  
孤四歲免喪即加五品之服幼學就傅遂疏百里  
之封立朝侍祠恩禮優渥自太子中允累遷至衛  
尉卿天姿嚴肅常持謙下之禮世祿隆盛每存恭  
儉之規不讀非聖人之書自為保家之主思不出  
位時無間言始終一心出入三紀嗚呼星迴日薄棟  
折榱崩命有所懸義無苟免享年四十有六開寶

陸香圃三間草堂藏書

八年冬十有一月二十八日沒于難明年春三月權窆  
于大塋之側至某年月日始備大葬之禮卜祔焉  
夫人王氏張氏劉氏皆早世並南朝之名族享小  
君之命數壺儀婦順彤史存焉子太素太初太冲  
等皆脩令名不墜前訓故能以淪胥之後具飾終  
之禮奉先之孝時以為難宗人永懷是有紀述辭  
曰

於惟我宗昭時顯庸積德垂範爰生我公出孝入  
悌夷心直躬生能業官沒不忘忠是有慶靈鍾于  
令子不墜其訓葬之以禮謀卜謀筮維桑終梓神



道永謚流光不已來者難誣斯文用紀

故唐朝散大夫尚書水部郎中崔君墓

誌銘 并序

公諱致堯字用之其先清河人也周室大風肇洪  
源于公望漢庭明月抗忠節于季珪德厚流光謀  
孫翼子冠蓋之盛莫之與京我高祖翼亮有唐四  
至丞相曾祖彝不仕祖得吏部員外郎考億建州建  
陽令值天下亂因而家焉今為建安人也君少而  
不羈長而好學介然如石非禮不行鄉曲之名籍  
甚于世季唐嗣業博采時才君以卿族之秀獻書

陸香圃三間草堂藏書

求試補江州彭澤滁州清流二主簿改建州浦城  
軍判官所至有聲應用不暇再為建州將樂令其  
地岩險其民獷悍寇攘亡匿率以為常君勵以嚴  
明信其刑賞汙俗咸革比戶安居遂獲貞幹之稱  
又遷紀綱之任改常州錄事參軍連考善最擢拜  
殿中丞遷虞部員外郎郡國之政多使案治忘身  
徇節綽有能名無何都下受兵羣帥入援以君為  
水部郎中寔掌軍饋既而時運告謝宗社淪胥諸  
侯之師莫不卷甲君與其部將南趨建安中塗衆  
潰遂沒于難春秋若干嗚呼興亡之數聖賢安能



免忠義之節顛沛必於是不然何以見伯夷首陽之風王蠋布衣之操也夫人吳氏克有婦德能緝素風藐是流離不墜門閥子憲寔定等皆稟庭訓咸脩詞業憲在舊國以進士擢第入朝為潁州沈丘尉復從州里之舉 皇上臨軒親試又擢高科為隨州觀察推官所謂善人必有餘慶某年月日憲等始脩大葬之禮號奉靈柩窆于某州縣鄉里之原禮也鉉素熟君行學因銘墓焉銘曰

嗚呼崔君百世清芬忘身徇國斯為貞臣種德垂訓斯為慶門允允故園莪莪高墳沒而不朽用勒斯文

陸香圃三間草堂藏書

故汝南縣太君周氏夫人墓誌銘 并序

夫人諱某字某廬江舒人三國時吳將公瑾之後公瑾葬于舒之宿松今裔孫奉祀者百餘家雖降在畎畝而時生間傑烈老諱本幼而遇亂自奮從軍吳王創基功冠諸將季唐建業位列宗臣官至中書令封西平王夫人即王之第某女也天姿玉瑩淑性川渟孝德內融柔儀外映旣笄歸于徐氏府君諱某即唐相司徒公玠之第某子也于時江左方盛二族齊榮婚姻之貴雄視王謝而夫人雅性謙謹率由禮經至於蘋藻之嚴環珮之節澣濯



之儉織紝之勤必以身先罔弗由道宗族親睦人  
無間言府君仕為閣門副使殿中少監早卒四子皆  
幼夫人提攜教訓親授經書及其出就外傳已通  
孝經論語矣性曉音律而尚雅聲善絲竹而精琴  
瑟習孝經而宗玄言齋居諷誦未嘗懈怠雖閨門  
之內常以慈撫而家人之節有若嚴君故其門風  
肅然先業不隕豈非天和克已而道氣感物者歟  
春秋四十八開寶九年正月二十一日終於建康瑞里官  
舍其年二月葬于江寧鳳臺鄉婁侯里長子某亦  
為諸司副使及入朝為京兆府醴泉令陝州錄事

陸香圃三間草堂藏書

參軍公府交薦遂升閨籍太子右贊善大夫夫人  
始以子貴授汝南縣太君至是朝命復追榮焉  
次子繼宏舉進士次繼宇次繼宗初夫人之亡會  
宗國淪覆窀穸之事不暇如儀至太平興國某年  
月日繼崇等始改窆于其所祔大塋焉禮也鉉與  
西平諸子辱為交遊及相府宗黨復勳事舊故得  
以門內之理為隧道之銘傳于無窮斯為實錄銘曰  
侯藩之子相門之嬪道高萊婦德劭陶親猗歆彤  
管永世方塵生榮沒哀何必眉壽粉田啓邑斯為  
不朽令子承家斯為有後狐郤降替二族依然陵



谷遷留松楸附焉謂天盖高福善胡愆勒銘泉戶  
蘭菊綿綿

大宋故亳州蒙城縣令賜緋魚袋曾君

墓誌銘

君諱文照字知章其先魯人百行之先並為家法  
子孫蕃盛不隕其聲末葉因官徙居南楚今為廬  
陵新淦人也祖朴考福皆不仕君生稟異氣卓然  
老成六經之旨有若夙習于時江表之地唐室猶  
興憲章文物不失舊典君年七歲應州里之舉以  
神童擢第選滿補江州東流尉遷靖安句容二尉

陸香圃三間草堂藏書

皆以清白敏慧承上率下和而有正能不自矜連  
考殊尤擢為吉州太和令桑梓之地瓜李多嫌君  
閨門之行素脩童艾之情已信而復臨事能斷盡  
公無私由是暮年政成就賜朱紱會宗國淪覆舉  
族入朝授亳州永城令舟車輻湊之地郵傳旁午  
之塗盤根錯節發矧靡滯事無愆素民不告勞上  
疏論以一邑之衆供列郡之賦指引利害矜然可分  
詔特許免其縣挽船夫歲省萬計改蒙城令其理  
益精頃之河南大蝗獨不入蒙城之境于是吏民  
相率詣闕借留優詔褒美許留三載會王師北討



君督本縣運輸深入虜庭危而後濟既還遇疾以  
雍熙三年四月日終於永城傳舍享年若干初君  
之赴選也余遇之于建康察言觀行知為良士因  
以表甥女姜氏妻之有子六人女八人君之從仕世  
塗多故王事靡盬不遑顧私雅志未申中路早世  
唯第三子乾度再舉進士名聞場中有後之慶當  
在于此即以某年月號奉靈柩歸葬于某鄉里祔  
大塋焉禮也嗚呼姻舊之故豈無佗人援毫濡涕  
識彼陵谷其銘曰  
有惠於民死事以勤嗚呼曾君永世清芬仙山之

陸香圃三間草堂藏書

陰章江之濱考終歸全下從先人刻茲琬琰垂示  
後昆

故唐內客省使知忠義軍檢校太傅尚

公美道銘

公諱全恭字子初其先清河人也粵若天監代商  
文王受命渭濱卜獵尚父膺期實始華宗誕彰餘  
慶在漢則丘園之盛德在唐則藩屏之名臣蕃衍  
孫謀著之家牒祖慈潤州館驛巡官因家焉考公  
廼為昇州牙將為郡守馮鐸使于淮甸與吳武王  
議疆事抗詞奮勵誓不辱命明年而馮氏兵敗恚



衆歸于廣陵吳王得之甚喜曰汝為馮公詬我真  
義士也今事我無易爾心即以右職處之賜與甚  
厚由是感激知己竟死事于鄱陽以故三子皆獲  
叙錄累贈右千牛將軍公即第三子質性端慤容  
貌矜嚴吉人寡詞非禮不動季唐有國公仕為客  
省承旨先主罷之特加任使凡所授職皆與先達  
長者侔動以繼之所至皆理累遷至館驛副使嗣  
君即位轉閣門副使遷客省引進使凡時務制獄  
多命公與焉循理持平甚獲時譽宣布詔命出納  
必信堅護師旅威惠得中不從諛以取容不矯激

陸香圃三間草堂藏書

以忤旨故考績無玷而主恩益深累遷內客省使後  
主即位兼領閣門使遙領婺州刺史初國之戈船皆  
屯于石頭城之後盧龍鎮下命曰龍安軍旅之重  
任也于是復兼龍安軍使明年改潤州監軍使權  
領州事善於為政大洽民謠逾歲徵還遙領饒州  
觀察使兼左龍衛神武護軍公固辭兵柄闔嶺之地  
岩險遼遠鎮守之寄嘗以為難又命公知忠義軍兼  
建州事蒞政三載建人安之會都下受兵羽檄相望  
公調發軍實應接舟師奔命之衆道路相望猶以  
不獲身先憂憤成疾朝廷方命公為節度觀察等



使留後檢校太尉使者未至甲戌歲冬十有一月  
二十五日卒于公署享年七十以十二月二十三日  
葬于建安縣某鄉某里前夫人蘇氏繼室安樂縣  
君孫氏皆早卒子三人審元審庸審能公以忠烈  
之風處親近之職守以周固齊以法度身貴而志  
遜祿厚而持廉凡同列者使于諸侯率多貪求浸  
以成俗公獨淡然無取出入垂橐士君子以此重  
之及邦國淪胥豪右降替向之聚斂者剪焉無餘  
唯公令嗣克家門族如故識者知有天道矣鉉少  
參近密與公嘗接笑言道義相期有若寮舊聲塵

陸香圃三間草堂藏書

永已慷慨嘗悲惜其風猷思其論譔昔裴子野之  
卒湘東王為誌矣而邵陵王又銘于羨道羨道有  
銘自此始也故仰前躅追而銘云

表海之慶世載厥聲展矣君子心純道貞恭職軒  
陛申威禁營將命四方宣風百城哀哉不淑永矣  
忠誠舊國禾黍交情死生濡毫頌美愴愴露纓

故鄉貢進士劉君墓誌銘

君諱鶚字仲翔其先彭城人也炎靈之裔繁衍萬  
邦占籍廬陵蓋重世矣高祖澗祖珍皆不仕父雄  
嘗從九江辟司兵掾自免去職闔門之教不肅而



成有三子君其仲也質性純素智識聰敏年十有五則知屬文未及弱冠馳名矣至于事親孝事長悌與朋友信接鄉黨諱動不違禮居常慎獨故州里者耆與時之名輩推重焉郡舉茂才擢升上第明年而宗國淪覆君慨然知時不利也于是閉門却掃為學益勤以為今之文人率以詞賦取高先王之教化蓋蔑如也乃據天下之務論古今變著法語八十一篇大抵宗尚周孔以質百氏之惑視其書知其人矣。皇宋二聖崇古尚文郡國孝秀親臨考覆君以詞場舊望復為本郡升聞余與翰林學

陸香圃三間草堂藏書

士賈公承詔先考第于南宮賈公重君之文以為古人之俊也乃第為高等而君徇難進易退之節稟外敏內愚之容及其敬庭復不中選退還鄉里篤行如初雍熙三年九月卒于家享年四十有三嗚呼有才有時命不我與自古同歎可勝道哉遺文累瘞不朽之謂也即某年月葬於本縣化龍鄉折桂里之原禮也君娶郭氏先十日而亡子師望文綺皆得父風其有後矣二女長適太原郭方次適隴西李某師望以余為父之知己也故千里號訴求誌其墓云辭曰



嗚呼劉生江楚之英才識兼茂時命難并歿于白  
屋闕此泉扃立言可法何必浮榮刻茲貞石永爾  
高名

徐騎省文集卷第三十完

陸香圃三間草堂藏書

附錄

宋故金紫光祿大夫左散騎常侍上柱國東海縣開國伯  
食邑七百戶責授靖難軍節度行軍司馬徐公行狀

公諱鉉字鼎臣其先東海郟人也周德之衰偃王  
以仁義所歸者七十餘國乃遜于江淮之南會稽  
太末里有廟存焉積慶所鍾令嗣蕃衍故自烈考  
以上皆生于會稽公所撰改卜合葬烈考太夫人  
于洪州西山墓誌詳矣公與弟錯屬烈考即世季  
皆幼稚太夫人撫育教導資以生而知之咸以雄文  
奧學克振令譽公未弱冠以廕釋褐為抄書郎直



宣徽北院機命文翰實專司之以名御密稱先主即位以本官直門下省賜緋試知制誥辭達典雅智效勤恪嗣主初拜祠部員外郎知制誥後覩受命草詔者無所經據不根事實由是駭議忤旨左遷泰州幕職途中詩云浮名浮利信悠悠四海干戈痛主憂三諫不從為逐客一身無累似虛舟滿朝權貴皆曾忤遠郭林泉已徧遊唯有戀恩心不改半程猶自望城樓謫居三年嗣主知其無罪徵復本官仍知制誥公餘力攻篆書度越陽冰而與李斯為等夷著質論十四篇極刑政之要盡君臣之際

陸香圃三間草堂藏書

並傳於世斯為不朽矣文書論議與故贈揆相韓公同志齊名時人謂之韓徐及江淮之平建州也而福州與越人拒命不服使陳覺馮延魯招撫之未報遂擅興兵攻取時軍帥不一聽而無上又出不以律衆敗績而退乃歸罪二使將誅之時陳覺之使國老宋公之所舉也于是上表待罪蓋欲救解之遂械二使以歸聽命公與韓公議赦此二人則萬姓謗讟之怨歸于上二使首領之惠在於齊丘辱國容奸斯為巨蠹遂同上書極言其罪追正刑書克協衆心式沮狂計嗣主親批答疏畧曰昨陳覺



之行實太傅舉之矣及師敗之後事下有司太傅無救援之詞有自訟之表以是之故得不再思何者先朝舊臣國家元老不惟舉人失偶可得興言直是謀之不臧亦未有加罪之理昔魏武帝乘降劉琮之勢將兼并吳國張昭時居朝右為吳老臣一旦勸請其君臣妾於魏此謀不以為拙曷以為拙乎賴周瑜輩力爭而止之及魏師之敗昭亦晏然自處吳大帝亦不之見責彼二子孤苦懷憤排之意戮之久矣此際長流遠郡斥為廢人五木被身一家狼籍永從流放與死何殊卿等憂國情深

陸香圃三間草堂藏書

除奸意切諸所嚮引批答未殫公與韓公同表謝略曰伏讀批答曰卿等憂國情深除奸意切是陛下知其奸也又曰永從流放與死何殊知陛下必不用也既知而棄雖在何為公事君匪躬疾惡好直危言危行始終不變率此類焉尋嚮拜中書舍人公嘗誘掖後進苟有一善必延譽之潔已請益者亦誨導之不憚壬子歲翰林學士江公知貢舉始以進士王克貞等三人及第盡復舉場之故事獨由公左右贊成之江公即長興三年盧華下及第嗣主因問北朝取人何如卿此來江公對以北



朝公薦私囑相半苦此來惟以公道選材實無有  
此事嗣主甚善之中書舍人張緯聞之以為皆大朝  
及第不本江公之意甚銜之時宰執皆非名第同  
力欲罷此科遂下制輟應舉焉明年公兼判文理  
院遂首言此事纔復不可遽止乃以進士張仲尼  
鳳賦來觀老子猶龍賦郭賁無聲樂賦印蔡石  
城虎踞賦寫之以進遂下制云去歲所司上言暫  
罷貢舉本難久廢况以經年其諸色舉人亦宜依  
舊解送自此不復廢矣公之為文長于典雅直而  
不迂以理勝為貴其武成王廟碑序末云微臣學

陸香圃三間草堂藏書

愧常師用慙兼備承明再入故無經國之才宣室  
徵還幸對受釐之問將使延州聽樂長聞雅頌之  
聲圯上授書世出帝王之佐蔣莊武帝廟碑序末  
云微臣潤色無功討論奚取思問神於先聖姑欲  
事君苟獲罪于玄穹曷容媚竈唯于舊史想見英  
風迺當罷役之初爰奉屬辭之語西州作頌誠慙  
邑子見稱南國刊銘或奉至尊所改又銘末云謝  
傳長逝王公不作獨我莊武先紆睿畧斯皆披文  
相質至言邁俗豈惟情見乎詞而已矣時江南久興  
建屯田楚州常州尤甚聚斂培克之輩侵奪射利



民不聊生言事者累諫弗聽洎國老宋公上疏主  
者堅執不易于是命公往察訪一如親行可興可  
廢悉以便宜從事後奏公既行而羣黨已切齒矣  
楚州應非理遷入屯田之產業盡還本戶百姓謹  
譁感泣如釋狴犴次至常州亦如楚州處置協比  
衆惡之徒名御以擅作威福徵還私第待罪蒼蠅貝  
錦膠固組織詰難問狀不容自理鍛鍊深刻將置  
大辟其貶制乃張緯所草末云尚以年齡方壯文  
學甚優特屈彛章宜從流放于是長流舒州時弟  
錯任右拾遺集賢殿直學士亦貶秘書郎分司東

陸香圃三間草堂藏書

都公前左遷泰州弟亦貶烏江尉及流舒州親友  
臨江相送韓相有詩云昔年悽斷此江湄風滿征  
帆泪滿衣今日重憐鵬鷁羽不堪波上又分飛在  
同城三年唯游覽勝境披玩典籍尤攻吟詠情性  
未嘗以得喪薑芥于方寸譔同將軍廟碑銘文宣  
王廟碑序喬公亭記九疊松贊皆足志之文刻于  
貞石及量移饒州未登途而周世宗之師過淮取  
舒蘄公遷攜家榜小舟由皖口歸昇州公賦詩末  
云一夜黃星照官渡本初何面見田豐其情發于  
中不顧言之太直如此明年授太子左諭德未幾



復知制誥拜中書舍人通署中書省事時周世宗  
弭兵脩好待嗣君以優禮異數凡章表往復討論  
潤色多公所為及世宗崩祭文寔公視草嗣主嘉  
賞時人傳寫為之紙貴侍嗣主殂于豫章護喪歸  
建業後主即位官職如故而訪聞詢謀無改嗣主之  
道其知舉也不獨考其文章必先察其德行故難  
于得人出羣拔萃者寔稱吳淑復以子妻之其所  
問策五道盡時務政理之要後主並親荅焉仍俾  
詞臣悉對後之主以尚書省綱條弛紊官司怠棄  
積習已久思公正之人以糾劾提振之從公為尚書

陸香圃三間草堂藏書

左丞踰月而罷以尚書右僕射游公判六司拜公  
為工部侍郎知制誥翰林學士尋以憲署曠職法  
吏侮文非委直清不能嚴肅拜公御史大夫而佞  
用讒勝吾道不行于是奉身而退拜兵部尚書知  
制誥翰林學士以先奉命脩嗣主實錄乃專以屬  
辭比事為務後主每有著述必令公兄弟視草而  
後編錄故雜說公為之序文集第集賢舍人為之  
序彼昔之二龍兩驥烏足以方茲令名焉王師之  
弔伐金陵也公急病讓夷請使於天朝以釋後主  
之前事辨疑分謗且服罪降名以御入為請庶不



隳奕世之國紀已行遂拜右僕射同參左右內史  
事及覲

太祖敷奏忠慤執議誠信雖不得請

太祖亦甚嘉歎美其秉節無撓旣復命自以不能  
副後主之望雪涕固諱不受其新命焉尋從後主  
歸 朝授太子率更令

皇上登極素知公之文學優贍久司教令特授直  
翰林學士院拜給事中侍從

鑿輿下并汾襲偽之地巡狩魏博逐入寇之虜申  
威耀德因壘懷柔告至策勳詔示填委雖翰林諸

陸香圃三間草堂藏書

公盡熙帝之載而公亦預有力焉數年拜右散騎  
常侍慶恩升左散騎常侍末年公著靜齋自箴篆  
書刊石寘于座右曰爰有愚叟栖此陋室風雨可  
蔽戶庭不出知足為富娛老以逸貂冠蟬冕虎皮  
羊質處之勿疑永尔終吉後之君子觀之有以見  
公名重益謙德成藏密與曰一無所鑒而窺冀所  
不休者是天之戮民不可同年而語矣惟公未冠  
筮仕名稱藉甚日彰夙習非聚學辨問之所克也  
稟心忠正治身儉約公家之事知無不為自幼至  
老惡其聚歛貪冒未嘗微置於懷俸祿所入不問



多少隨時供億而已居處求安不務顯敞但聊以蔽其風雨量家所受餘分貸親故舊知寓止焉與人交有始有卒必誠必信久要不替雖中或不善人無間然初與禮部尚書常夢錫給事中蕭儼之為莫逆蓋以二公嘗忿宋國老狃于締名御之業包藏凶慝每章言其罪公亦同力疾惡先主嗣主因審度為虞故不任之以政及宋國老暮年因陳覺李徵古協謀不軌貫盈事發同時殛死嗣主追念常蕭與公疇昔敢言果今日之速禍也時常公已卒因言曰夢錫常欲殺齊丘恨其誅戮不見于是

陸香圃三間草堂藏書

贈右僕射馬適後主從容言及此事公且曰夢錫先卒不見齊丘之敗嗣主已追贈矣唯臣與蕭儼之目覩朝典况臣塵忝官列八座矣獨蕭儼之往為理官以赦前失入貶黜吉州以老告退願以臣今所居官授儼之旌其先見後主由是召蕭儼之至建業以公所陳列慰勞特授工部尚書以年邁懸車致仕居吉州給奉祿終身焉公于內外族親無疎密待之如一其有孤嫠無告者皆糾合收養稱家之有無隨事拯濟婚嫁視之如家人子雖讒口謗議紛紜盈耳公自信不疑唯恤孤念舊是急不知



其它及左遷邠岐亦望此獲譴矣有子曰夷直朗  
州堯源令先公疾卒女三人長適左贊善大夫高  
名御交次女適國子博士吳淑先公卒次女幼有才  
淑未笄而卒公享年七十六某年月日以疾終于  
邠州官舍恬然神氣不亂唯禁家人勿哭以為怛  
化但囑以殯歸于洪州西山祔葬于烈考太夫人  
之墓即以其年月日洪州胡某以舟至京護載公  
之柩歸西山從理命也公業隆儒行奉五常而不  
墮志嚮道風稟三寶而無玷故其立言蘊德久而  
彌芳繕性觀妙老而益壯寔古之人歆克播遺風

陸香圃三間草堂藏書

允資鴻筆謹狀



陸香圃三間草堂藏書

墓誌銘

大宋故靖難軍節度行軍司馬檢校工部尚書東海徐公墓銘

金紫光祿大夫尚書右僕射兼中書侍郎平章事監脩國史上柱國隴郡開國公李昉撰

上即位之元年冬以學士李昉獨直翰林詔太子率  
更令徐鉉入院分直視草是時昉與公以同道相知  
論交契之始也越四年春

天子率太師親征太原并壘既平遂北幸塞垣耀  
兵盧龍秋七月凱歌歸于京師軍衛之中書詔填  
委公援筆馬上應答如流以扈蹕勞遷給事中直  
學士院如故又四年授右散騎常侍始罷文翰之



職端拱元年 帝親耕籍田改左散騎常侍積階  
至金紫光祿大夫叙勲至工柱國累封至東海郡  
開國侯食邑一千戶以淳化二年秋九月檢校工部  
尚書出為靖難軍節度行軍司馬明年八月二十六  
日辰時起方冠帶遽命筆硯語左右曰吾疾作矣  
手疏一幅約束後事又別署一幅道者天地之母書  
訖而終年七十六陝西道轉運副使鄭適來邠州遂  
出家財竭力襄事即以其年十月奉遷靈柩還  
京師權厝於板橋東南之佛舍愛壻國子博士吳  
淑門生殿中丞杜鎬時皆典治中秘書遂以公凶

陸香圃三間草堂藏書

訃聞 上覽表軫悼詔出內府錢二十萬賜其家及  
明年七月洪州奉新縣義門胡仲堯自豫章具舟  
檝迎公之喪葬於洪州新建縣西山之鸞岡原奉  
遺令從先塋也公字鼎臣其先會稽人自言生于  
揚州曾祖諱源祖諱徽皆隱德不仕父諱延休衛  
尉卿贈左僕射才高道直有名于時公幼孤與弟  
錯俱苦節自立未弱冠以文行稱於時仕江南李  
氏周旋三世歷抄書郎直宣徽北院尋直門下省  
三知制誥一遷司封郎中兩拜中書舍人再入翰  
林為學士自貶官起為太子右諭德由尚書左丞



為兵部侍郎即為御史大夫由大夫為吏部尚書由尚書為右僕射同參左右內史事堅讓不就王師下金陵隨後主歸朝以太子率更令奉朝請今諫議大夫張公必說公在江南時奉太夫人慈訓不妄游下帷著書雖親族罕見其面年十六遇李氏先主霸有南土辟命累至釋褐連任書府由是經史百家爛然於胷中矣其典誥命也落筆洒翰應用無窮皆混然而成有雅正之體當時名士如韓熙載者無敵尤長于制誥公與之齊名其豫機密也居中守正無所附會雖在家晏居如對君父其恭慎

陸香圃三間草堂藏書

也如此當時用事臣有陳覺魏岑者樂福好權多撓時政公疾之如讎其掌貢舉也至公取人不受私謁先策問而後詞賦進德行而黜浮華當時舉場號為得士公弟內史舍人鍇每主文柄亦以直道自持故江表後進力學未至者聞二徐為春官多望風引退其精鑒無私也如此其持憲也當官執法無所屈撓姦邪為之側目權貴因之斂手當時言風憲者惟公與故御史中丞江公文蔚王師之渡江也公將本君之命使于朝廷且乞緩師以奉祭祀太祖引見謂公曰汝主託疾不朝乖事大



之禮况吾兵業已行無中輟之理歸報汝主善為之謀公因慷慨鋪陳自言成敗之道表明後主忠孝之節 太祖亦為之動容厚禮之遣歸初大軍已圍建業後主思命于交兵之間左右咸有難色公欣然請行後主謂之曰爾既往即當止上江救兵勿令東下公曰是行非全策今城中所恃者救兵奈何以臣此行止之後主曰比以和解為請復用決戰即是自相矛盾于尔得不危乎公曰今豈以一介之微而忘社稷之重但置臣於度外耳後主撫之泣下曰時危見節汝有之矣及歸 朝

陸香圃三間草堂藏書

太祖盛怒責之曰吾向與汝言何為弗達于汝主且拒抗之罪皆汝所為公頓首謝曰臣為江南大臣而其國滅亡抵此死有餘罪餘復何言

太祖于是歎息曰忠于所事者乎汝當事我如事李氏命坐存撫甚厚故相太子太師王公溥一見如

舊相識每有經史異義多質疑于公由是琴尊嘯歌筆硯酬唱無有虛日相得甚歡故工部尚書李公穆有清識嘗語人曰吾觀江表冠蓋若中立有道之士惟徐公近之耳兵部侍郎王公祐負才尚氣未嘗輕許人及見公嘗言於朝曰文質彬彬學



問無窮惟徐公耳公亦曰王公詞如江海心無城  
府真奇士也今吏部侍郎李公至翰林學士承旨  
蘓公易簡皆當世英俊奉公以師友之禮公仕朝  
廷將二十年前後錫賜所得俸祿所入備伏臘外  
未嘗蓄聚一金所居之地僅蔽風雨惟古木數株  
每夏秋之際霖潦為患頽垣壞宇人不堪其憂而  
公處之晏如也江南故人子弟暨親族之孤遺者  
來投於公歲無虛月公分廩祿以卹之虛館舍以安  
之殆于終年未有倦色有布衣蒯亮者老而多誕  
游公之門僅五十稔年九十猶矍鑠不衰每從江

陸香圃三間草堂藏書

南來詣公公置之道院日與之碁未嘗語及佗事  
而待之如初公嘗言江南有處士朱貞白嘗語人  
曰今人或言不欺神明也吾嘗佩服斯言不敢為  
欺心之事有故人謝岳嘗為虢州盧氏令刺史與  
之有隙凡選舉之制過七十即罷去遂奏謝年過  
不堪其任時江東初下仕人有可疑者咸質於公  
謝因私請曰某之齒公實知之苟朝廷問公不敢  
望公言未七十但言不知其年即幸矣公曰君之  
甲子某具知之而云不知是欺天也苟或見問必  
以實對其至行無誑又如此公為文智思敏速或



求其文不樂豫作令其臨事見白立為草之云速則意壯敏緩則體勢踈慢公愛壻吳淑言江南宰相馮延巳嘗語人曰凡人為文皆事奇語不尔則不足觀惟徐公不然率意而成自造精極時人以為知言所著文多遺落今其存者編成三十卷又擬徐幹中論作質論數十篇集耳目聞見之異作楷神錄二十卷並行於世公文學之外長于篆隸其書札之妙自成一家當世士大夫有得其書者無不寶之以為楷法任常侍曰奉詔與直史館句中正等重脩許慎說文自撰韻譜一十卷學者伏其精博

陸香圃三間草堂藏書

公嘗慕老子清淨之教莊周齊物之理故內不能以得喪動外不能以榮辱干然而為學之心老而弥篤在邠州日以時俗為文字偽謬乃親以隸字寫說文字體纖細正如蠅頭過數萬言年高目明洞見毫末其精力不怠如此夫人太原王氏朗州桃源令夷直並先公而卒長女適吳氏早亡次女適左贊善大夫高慎交幼女十七娘才淑過人未及笄年而夭自為誌文辭甚悽楚噫孔門四科德行文學洪範五福壽考康寧在于古人鮮有兼美惟公高才懿行善始令終所謂登孔門之二科居洪範之三福也語曰



善人吾不得而見之矣惜哉銘曰  
祖丘軻兮宗老莊奉三寶兮師五常生維揚兮仕  
建康歸 皇宋兮老大梁歿幽土兮葬豫章儒林  
文人兮今也則已嗚呼

祭文

維淳化三年歲次壬辰十月辛酉朔十八日戊寅  
銀青光祿大夫尚書吏部侍郎兼秘書監上柱國  
李至朝奉大夫左諫議大夫充史館脩撰判館  
事上柱國賜紫金魚袋楊徽之張洎等謹以清酌  
之奠致祭于 故左省騎常侍徐公之靈惟公博

陸香圃三間草堂藏書

識宏才懿文茂學如金之渾如玉之璞天然混成  
不加雕琢頃在江左已聞素履及來 天庭孰不  
仰止周旋清顯殆將二紀相如視草隰朋近侍篆  
籀稱絕典謨得體其馨如蘭其直如矢令聞令望  
之才之美今也儒宗古之君子五百年來一人而  
已道屈于位遇 休明之世未盡伸才用于命當  
哀晚之年不得志嗟乎天地之間人生如寄自古  
迄今其誰不死矧素髮之垂領復何悲乎已矣可  
惜者淪于遠郡契闊千里鵬鳥之賦未成二豎之  
灾奄至淳于意兮止一女鄧伯道兮終無子此素



友清交門生故吏可以失聲而長號沈瀾而屑涕  
以為天道難忱善人如是至受教文字執弟子之  
禮微之洎有舊瀟湘影故人之契迎旅櫬於西郊  
風切切兮雨蕭蕭靈筵恹兮素幃動疑彤纒于寂  
寥嗚呼臨喪一奠庶英魂之可招尚享

挽歌

吾道亾宗匠明時喪大儒傳家無嗣子封岳有遺  
書命劣長沙賈名齊鄴下徐不知千古後文行復  
誰如

執友韓夫子傳家弟楚金人稱聯壁重世慕二龍

陸香圃三間草堂藏書

深鮑謝須慙德機雲亦醉心可憐黃壤下埋沒此

瑤琳

海內才名重儒中學問高病猶不釋卷老亦自揮  
毫蠹簡披皆識亾書誦豈勞如能百身贖爭惜一

鴻毛

說文脩古篆質論著新詞尚父鷹揚頌周瑜水戰  
碑家藏為世寶手寫作人師惜不歸宣室吾皇問  
受釐

薄暮邠郊遠何人不慘顏無兒見星往有妾護喪  
還舊宅猶臨水空車却度關平生衣上泪今日為



君斑

左散騎常侍東海徐公

此五君詠中之一

徐公真丈夫不獨文章伯江南兵未解主憂臣慘  
戚公願紓其難苦求使上國庶獲一言伸少息苞  
茅責其君驚且歎執手涕沾臆謂言知尔晚何此  
忠義激天子叱在廷誚讓雷霆赫公亦從容對曾  
不渝神色仁者必有勇斯亦古遺直書大略其小  
我有春秋癖所以此詩中不言公翰墨庶警事君  
心勉旃希令德

後序

陸香圃三問草堂藏書

徐公既沒門人等論次其文為三十卷曩秘閣吳  
正儀今翰林潁川公並為之序論之詳矣都官員  
外郎胡君克順通才博雅樂善好賢早遊騎省之  
門深蒙鄉里之眷寶茲遺集積有歲時鏤板流行  
庶傳悠永因以丞相趙郡文貞公鄧帥隴西公所  
作墓誌挽詠等列于左次用垂茂實俾題于後以  
記厥由大中祥符九年八月太常丞集賢校理晏  
殊序



陸香圃三問草堂藏書

明州重刊徐騎省文集後序

騎省徐公文集三十卷天禧間尚書都官員外郎  
胡君克順編錄刊行且奉表 上進

章聖皇帝降詔獎諭參知政事陳公彭年為之序  
引丞相晏元獻公復為後序騎省在江南有重名  
仕天朝為近侍以文翰忠直在當時諸公先既沒  
丞相趙郡李文正公寔誌其墓所以稱述推尊之  
者甚至距今且二百年其英名偉節得以不泯而  
為後學法者繫文集是賴年世賈遠兵火中厄鮮  
有存者偶得善本使公庫鏤板以傳紹興十九年



十一月十日右朝議大夫充敷文閣待制知明州  
軍州事提舉學事賜紫金魚袋徐琛跋

陸香圃三間草堂藏書





